

## طباج الريس

يوسف معاطي

الداراهصرية اللبنانية

الدار المصرية اللبنانية 23910250 عبد الخالق ثروت تليفون: 2390050 فاكس: 23909618 ـ ص.ب 2022 E-mail:info@almasriah.com www.almasriah.com

رقم الإيداع: 11257 / 2008 الترقيم الدولى: 7 - 390 - 427 - 977 جميع حقوق الطبع والنشر محفوظة الطبعة الأولى: جمادى الآخر 1429 هـ ـ يونيو 2008 م

الإخراج: حسين الشحات التصميم والتنفيذ: خالد الناقة التصوير الفوتغرافي: خالد زكى التصوير الفوتغرافي: خالد زكى الرسوم الداخلية والغلاف الفنان: عمرو فهمى

### إهداء

إلى الرائع المثقف السينمائي الناقد المبدع.. على أبو شادى الذي صار - لسوء حظه وحسن حظنا - هو الرقيب على الأفلام. والذى لولا أنه أجاز هذا السيناريو ما كان الفيلم رأى النور، ولولا أنه حذف بعض المشاهد من هذا السيناريو ما كان هذا الكتاب رأى النور.

#### المقدمة

برغم أن السيناريوهات المطبوعة في كتب من أكثر الإصدارات مبيعًا في أوروبا وأمريكا، فإنها ليس لها الحظ نفسه في عالمنا العربي، فلا تجد الناشر يقبل على طبع سيناريوهات أفلام أو مسلسلات، وحتى المسرحيات أخيرًا لم يعد لها القارئ الذي ينتظرها بشغف، ويقبل على قراءتها، ولقد حاولت أن أصل إلى السبب في ذلك.. فوجدت أن انتشار القنوات الفضائية وما تبثه بشكل دائم من الأفلام والمسلسلات، جعل المتلقى لا يكلف نفسه عناء القراءة والتخيَّل والتأمل، مادام العمل الفنى متاح له بصورة سهلة للغاية، ومادام العمل الفنى يأتى إليه في الوقت الذي يشاء بضغطة بسيطة على الريموت كونترول، فما الداعي لأن يبحث عنه في المكتبات؟ ويجهد

وبرغم ذلك . . فقد تمنيت كثيرًا أن أطبع أعمالي الفنية سواء السينمائية أم التليفزيونية في كتب بالصور الأصلية التي كتبتها بها.. ولا أعلم لماذا تمنيت ذلك!! هل خرج المخرج مثلاً عن الإطار الذي أردت أن يظهر به الفيلم أو المسلسل؟ لا أبدًا. فمعظمهم حافظ قدر استطاعته على أن يقدّم العمل في الصورة التي أحببت أن يظهر بها.. هل كان الإنتاج مثلاً ضعيفًا أو شيئًا من هذا القبيل؟ لا .. لم يحدث. كان الإنتاج دائمًا يحاول أن يرضيني، ويرضى العمل الفني .. هل قَصّر الممثلون الذين قاموا بالأدوار التي كتبتها - إطلاقًا - بل قدموها بإبداع حقيقي يستحق الإشادة. إذا لماذا أريد أن أطبع سيناريوهاتي؟ أقول لكم..

أولاً: لقد بذلت جهدًا مضنيًا في كتابتها.. وأريد للقارئ أن يبذل جهدًا هو الآخر في تأملها واستيعابها.. لتزداد المتعة ويزداد الأثر..

ثانيًا: لأن القارئ حينما يقرأ السيناريو يصبح هو المخرج الثاني للعمل.. فيترك لشاشة ذهنه حرية الرؤية والتصور الخاص به.

ثالثا: وهذه نقطة مهمة أن أشياء تسقط من السيناريو عند التنفيذ لأسباب كثيرة منها مثلاً الرقابة.. ومنها أيضًا رغبة المخرج في التلخيص والإيجاز، لأن العمل السينمائي له إيقاع خاص يملكه غالبًا المخرج.. أما إيقاع السيناريو المكتوب والمقروء فهو الذي يراه الكاتب وحده.. ولابد أن ينصاع الكاتب لرأى المخرج لأن العمل السينمائي أو التليفزيوني عمل جماعي لابد وأن نتعاون جميعًا ونقرب وجهات النظر مهما اختلفت ليخرج العمل إلى النور.

أما الكتابة فهي عمل فردي يعبر عن وجهة نظر شخصية هي وجهة نظر كاتبه.

شيء آخر أحب أن أشير إليه وهو أن كثيرًا من شباب الكتاب يريدون أن يجربوا كتابة السيناريوهات، وكثيرًا ما يطالبونني أن أعطيهم نسخة من سيناريوقديم لكي يطلعوا عليه.. كنموذج يساعدهم على المحاولة الأولى.. وقد يتصور البعض أن قراءة السيناريو مسألة صعبة أو معقدة تتطلب دراسة أو شرحًا.. إطلاقًا.. بل أنا أتصور أن قراءة السيناريو أسهل من قراءة الرواية.. بل هي أقرب إلى قراءة القصة القصيرة.. فكل مشهد من مشاهد السيناريوهوقصة قصيرة مستقلة بنفسها. ويحدد المشهد عنصرى الزمان والمكان في وقت ومكان حدوث المشهد.. وعلى اليمين دائمًا ترى الوصف.. وصف المكان أو وصف الشخصية أو وصف مشاعرها لحظة الكلام، بينما على يسار الصفحة تجد الحوار وحده بين الشخصيات.. وكأنه يحدث أمامك بالضبط.

وهناك نقطة أخيرة أحب أن أشير إليها وهي الفائدة التي تعود على القارئ العادي، من غير المشتغلين بالفن أو الحالمين به، حينما يقرأ سيناريو، فالحقيقة أن فن السيناريو هو فن الحياة نفسها بتفاصيلها الدقيقة وما أحوجنا دائمًا في الواقع الذي نعيشه إلى أن تكون عندنا القدرة على كتابة سيناريوهات المواقف التي نتعرض لها: تأخرت مثلا حضرتك عن موعد العمل اليومي.. والمدير لا يرحم . . ويجب أن تدخل له لكي تبرر له سبب تأخرك . أنت هنا في حاجة إلى سيناريو متقن تحكيه له.. وكلما كان السيناريو الذي تحكيه منطقيًّا كان مقنعًا.. ضبطتك المدام جالسًا في كازينو مع «مُزّة حسناء» ماذا تقول.. «ماذا تحكى؟! إيه السيناريو؟! ولا تنكر عزيزى القارئ.. أننا جميعًا بدأنا القراءة بطريقة السيناريو في مجلات ميكي وسمير وتان تان، وكنا نستمتع بذلك جدًّا ونتعايش معه بصورة كبيرة.. وإن كل أكاذيبنا ونحن أطفال يرجع الفضل فيها إلى قراءة السيناريوهات التي قام ببطولتها عم بطوط وعم دهب، وميكي وميمي وبلوتو، ثم إن كلمة سيناريو لم تعد تستخدم في المجال الفني فقط .. بل صارت كلمة شائعة في السياسة أيضًا.. ألم تقرأ المانشيتات التي تقول.. سيناريو أمريكا في العراق.. وسيناريو الانتخابات في المرحلة المقبلة.. وبالتالى فالسيناريو صار يفرض نفسه علينا في كل مجالات الحياة، لنقرأ السيناريو ولنتعلم كيف نؤلف السيناريوهات الخاصة بحياتنا ببراعة تنقذنا من مواقف كثيرة سنتعرض لها بالتأكيد.. ولنتذكر دائمًا قول الشاعر:

الدراما مش حصل وح يحصل إيه الدراما إزاى وإمتى وفين وليه

لوم

# مشاهد متتالية قبل بداية الفيلم

•



تبدأ العناوين.. ونحن نرى بدايات مرور موكب الريس.. والكوبرى خال تمامًا من المارة. العساكر الواقفين على مسافات متساوية في الطريق والشوارع.

حالة توتر الضباط.. شوتات مختلفة.. لجندى يقف انتباه.. وضابط فى منتهى القلق يمسك باللاسلكى.

ثم يمر موكب الريس. سيارة الريس وخلفها التشريفة كاملة. ولا نرى وجه الريس. ربما نرى علم مصر فوق السيارة.

#### قطع

شوارع

الإشارات المزدحمة والتوقف التام، وحالة القلق والزهق عند قائدى السيارات.. والبعض ينزل من سيارته وينظر أمامه.

قطع


شوارع

مرور الموكب مرة أخرى.

نرى يد الريس وهى تشير من السيارة فقط. الموكب، نرى وجه الريس لأول مرة وهو ينظر من السيارة. من السيارة.

نرى سيارات الأمن والأسلحة. ثم يعود برأسه إلى الوراء.

الموكب والريس ينظر فيجد كل الأسر واقفة في البلكونات لكى يروا الريس. الريس ينظر إليهم من السيارة. ويخرج يده محييًا لهم فيحيونه بحماس شديد فيبتسم لهم بسعادة ويمر الموكب.





موكب الريس والناس يهتفون له. وهو يشير لهم من السيارة.، والطوابير واقفة على الطريق تحمل هتافات التأييد.. مرحبة بالسيد الريس.

يرى أطفال المدارس.

لحظة صمت.. والريس يتأمل الشوارع الجميلة والأشجار الوارفة.

حازم يهمس في الجهاز.

الريس: إيه ده يا كريم.. الناس دى كلها طالعة ليه؟

كريم: حب الناس يا ريس١٠.

الريس: والعيال سابوا مدارسهم ليه هما

حازم: لما عرفوا إن سيادتك معدى . خرجوا يرحبوا بسيادتك .. مقدرناش نسيطر عليهم يافندم١٠.

الريس: اركن لي في أي حتة يا حازم.

حازم: خيريا ريس.١.

الريس: عاوز أعمل زى الناس.

حازم: نرجع المكتب يا ريس.

الريس: لا.. أنا عاوز أروح مراحيض عمومية عادية خالص.

> حازم: حاضريا فندم. سيادة الريس عاوز يعمل زى الناس.

> > قطع



الضابط: زى الناس.. حاضريا فندم.١.

ضابط في سيارة شيروكي يرد على اللاسلكي. قطع



السيارة تقف أمام مراحيض عمومية رائعة من الخارج.. مثل المساكن الجاهزة الأوروبية. الريس ينزل.. ويتأمل المدخل.

**الريس:** دى القرية الذكية.

حازم؛ لا يا فندم.. دى المراحيض العمومية

الريس يدخل.. وخلفه حازم وبعض رجال الحرس الخاص.



نحن في مكان غاية في الفخامة.. مليء بالورود ولافتات رائعة.. من نوعية.. لا يهمنا سوى راحة المواطن.. اكتب رأيك في المراحيض.. ونحن على استمداد لتلقى أى شكوي.

شاب وسيم للغاية يقف مرتديًا بدلة أنيقة.. يقدم للرئيس منديلاً معطرًا على صينية فضية.. وزجاجة كولونيا ويبتسم في احترام

الريس يدخل .. يتأمل المكان شم .. يومئ

يخرج الريس.. وحازم يشير لرجاله أن كل شيء تمام.

قطع

はらりは当



موكب الريس يتحرك من أمام المرحاض ثم فجأة.. نرى ونشًا أو رافعة ضخمة ترفع المرحاض.. وتتحرك به بعيدًا والأشجار.. وكل شيء.. ثم نرى متولى الطباخ وهو مواطن عادى مكان الحمام في الخرابة واقفًا وحده في الخلاء وهو يتبول.. وينظر خلفه لا يفهم أى شىء مما حدث.



الريس يدخل مكتبه وهو في قمة الغضب ومن ورائه حازم حسين ووزير التموين.

حازم يعطيه ملفًا يوقع عليه الريس واقفًا.

يضحك.

وزير التموين ينظر إلى حازم في ذهول.

قطع

الربيس: الناس ح تعيش ازاى يا حازم.. لما كيلو اللحمه يوصل 40 جنيه الناس تاكل إيه؟.

وزيسر التموين، سعادتك عارف الزيادة السكانية في ارتفاع مستمر.

الريس، وهما السُكان بيزيدوا.. والمواشى ما بتزيدش. هومشروع تحديد النسل ماشي على المواشى .. والبنى آدمين لأ.

حازم: سيادتك يا فندمح تشوف بنفسك أكبر مشروع لتسمين العجول في الشرق الأوسط عندنا هنا في مصر في خلال يومين.

الريس: لأ.. ح أشوفه النهارده.١.



نرى مزرعة بها 200 رأس ماشيه من البقر وعربات تنزل عجول في المكان. وزير التموين ووزير الزراعة وحازم حسين يتابعون العمل.

حازم: أنا قابل لسيادة الريس.. المشروع فيه 2000 راس؟۱.

و. التموين: اطمن يا حازم بيه.. إحنا حولنا صفقة العجول اللي كانت جايه من الصومال ورايحه المدبح على هنا.. ما تقلقش.١.





موكب الريس.. وسيارته تقف أمام مزرعة العجول.. ينزل من السيارة وخلفه الرجال وهو ينظر إلى العجول.

يجد 50 راس فقط هي التي تأكل.

الريس يتأمل المواشى.

الريس، دول كلهم متربيين هنا.١. الوزير، طبعا يا فندم. الريس: الجاموسه دى من هنا. الوزير: طبعا يا ريس. الريس: والتور اللي هناك ده. الوزير: صناعة وطنيه يا ريس. الريس: البهايم دول كلهم غرب عن المكان يا سيادة الوزير. حازم: إزاى يا فندم ١٤.

وزير التموين: المشروع ده يا ريس إحنا

شغالين فيه بقالنا 3 سنين.. والمحصله

النهائية بعد التسمين 2242 راس.١.

الريس: البهيمه الغريبة يا حازم لما بتروح مكان جديد عليها بتقعد يومين مابتاكلش١٠. والباقى ده كله صومالى . . رئيس مجلس إدارة المشروع ده يتحول للتحقيق.

رد فعل على وجه حازم. رد فعل على وجه وزير التموين. الريس ينظر إليهما .. وينصرف.



أبناء صلاح خال انشراح بالمرايل المدرسية يستعدون للذهاب إلى المدرسة والتليفزيون وبرنامج صباح الخيريا مصر.

أم انشراح تحاول الانتهاء من ذلك كله.. تعد الساندوتشات لهم.

> تخبط على باب حجرة صلاح. يفتح الباب مستاءً.

مذيع النشرة، وتشجيعًا للثروة الحيوانية في مصر .. افتتح السيد الريس مشروع الدولة لتسمين العجول المصرية مية في المية .. ويحتوى المشروع على 50 ألف رأس من الماشية.

طفل 1: كل يوم فول.١.

طفل 2: عاوزين حلاوة.

**طفل** 3: عاوز مربى.

أم انشراح: مفيش غير فول وماتعصبونيش أنا مش ناقصاكو.

ما تصحى يا صلاح تشوف عيالك.

صلاح: فيه إيه يا تفيده ع الصبح ١٤.

تفيده: هو انت قاعد لى فى البيت إنت ومراتك عشان تخلفوا بس ما تخلى الشملولة تقوم تلبس عيالها وتفطرهم.

صلاح: تعبانة يا تفيده.. تعبانة.. طول الليل نفسها غامة عليها.

تفيده: يا لهوى .. إنتوا ناويين تبلونا بعيال تانى.



متولى يقوم بعمل طبق لا نعلم ما هو على البوتاجاز بمهارة شديدة .. وانشراح بجواره .. على صوت تفيدة وهي تقول الجملة الأخيرة.. يالهوى.. إنتوا ناويين تبلونا بعيال تانى. صارخًا.

وهو يمسك انشراح محاولا تقبيلها.

متولى: عقبالنا يارب.. أناح أموت يا انشراح.. نفسى في حتة عيل بأه بقالنا سنة ومفيش أى حاجة.

انشراح: وبعدين يا متولى.. لا العيال يخشوا علينا.. اتلم.

متولى: أنا ملموم من يوم ما اتجوزنا یا انشراح.

انشراح: هانت. هوه فاضل كام قسط على الشقة ونستلمها.

متولى: أنا مش قادر.. مش قادر أستنى الشقة.

يحاول الاقتراب منها.

يدخل الأولاد مسرعين.. انشراح تنفلت من بين يديه.

تخرج مسرعة وهوفي قمة الإحباط.

انشراح: ياللا .. ياللا يا عيال ع المدرسة.



انشراح خارجة من المطبخ. يخرجون ويتجهون نحو الباب.

يخرج متولى مسرعًا وينادى عليها وهو ينظر نحوها كعاشق ولهان.

على السلم.. حجرة بالبدروم يعيش فيها الأولاد يخطفون الساندوتشات في سعادة ويجرون.

تفيده: ح تنزلي كده وانت على لحم بطنك.١٠ انشراح: مش ناقصة كلام من الناظر يا ماما .. ياللا يا عيال .

#### متولسى: أبلة انشراح

انشراح: نعم یا متولی!.

متولى: امسكي.

انشراح: إيه دول ١٤.

متولى: ده واحد سمين وواحد مورتة.١.

انشراح: ح أفطر سمين ومورتة يا متولى ١٤.

متولى: ده انت مُدرسة ألعاب. يعنى شقيانة طول النهار.. أنا عاوزك تقعدى مع نفسك كده

في الفسحة وتعضى فيهم.

انشراح: أنا مش رايحة المدرسة.. أنا رايحة

متولى: خيريا أبلة انشراح.

انشراح: رايحه أقدم شكوى في نقيب المُعلمين.



متولى خارجاً وراءها على السلم.

متولى: وأنا أشتكى لمين بس.. اسمعى.. أنا أخدت مفتاح شقة واحد صاحبي.. شعقة مفروشية. تخلصي حصصك وتجيني ع العربية ونروح على هناك. انشراح: تاخد مراتك شقة مفروشة يا متولى، متولى، مش أحسن ما اخد حد غريب.١.

قطع



صراخ صلاح من فوق. انشراح تنزل هي والأولاد. متولى يرتبك.

يطلع إلى صلاح.

قطع

ص صلاح د . . يا متولى . . يا متولى . ا.

متولى: أؤمريا عم صلاح. ص صلاح: تعالالي هنا.١.



صلاح ومتولى واقفين أمام بيت انشراح.

يعطيه طبقًا به طبيخ.

يتذوق ثم يبصق.

متولى يأخذه جانبا ويهمس له.

صلاح: أنا راضى ذمتك يا متولى .. إنت راجل طباخ بريمو وعشرة على عشرة وكفاءة١٠٠٠ مش عشان ما انت جوز بنت اختى.١.

متولى: خيريا عم صلاح.

صلاح: إيه ده.. دوق كده وسمعنى.

متولى: ده.. ده.. أنا طبخت كتير وقليل يا عم صلاح إنما ده ماوردش عليا قبل كده.

صلاح: الهانم بتستكردني .. قال إيه؟ . ده خَبيزه؟. ده خَبيزه.١.

متولى: ده برسيم بالدمعة.

صلاح: بس. حكمت يا متولى.. يبأه لما واحدة تحط لجوزهاع الفطار برسيم يبأه إيه؟١.

متولى: يبأه حمار.

صلاح: هوه مين ده يا متولى.

متولى: وهو فيه حد بيفطر طبيخ ع الصبح يا عم صلاح.

صلاح: أنا كده يا أخى.. حد شريكى.١.

متولى: اسمع يا عم صلاح.. انت تسيبك من اللي في إيدك ده.. أناح أعمل لك طاجن كوارع من اللي وصي عليه لقمان.

صلاح: والنبى يا متولى.

متولى: محبة يا راجل.. ده احنا أهل.. بس لو تسيب لى الأوضة الليلادي عشان أريح فيها أنا وأبلة انشراح.

صلاح: تدفع أرضية.

متولى: أرضية يا عم صلاح؟. دى آخرتها؟!. صلاح: اتكل انت على الله يا متولى ، اتكل على الله دلوقتي.١.

صوت زوجة صلاح تناديه بنعومة. صلااااح.١.

فيبدو عليه أنه يريد الاختلاء بها.. يدفع متولى خارج الباب.

رد فعل على وجه متولى في قمة الغيظ..



متولى خارجًا من بيته. وهو في قمة الضيق. المرأة 1: سي متولى.

متولى أثناء مشيه في الحارة.

امرأة أخرى تفتح الشباك.

تفتح إحداهن الشباك.. امرأة جميلة.

**متولى:** سلقتى الكرنب.١.

لها إيه بس١٤.

متولى: نعم يا أم إبراهيم.

المرأة 1: سلقاه ومقطعاه.

متولى: حطيتي ورق اللورى وجوزة الطيب.

المرأة 1: خلطة المحشى بتبوظ منى .. أعمل

المرأة 1: زى ما قلت لى بس برضة بتسيب

متولى: ده مش عيب خلطة.. أنشفى عليها وانت بتمشيها.

المرأة 2: سي متولى.

متولى: نعم انت روخره.

المرأة 2: الملوخية ساقطة في الحلة.

متولى: تبأى ما شهقتيش.

المرأة 2: والنبي شاهقة لها.

متولى: سمعيني شهقتك.

متولى: دى شهقة بامية الله يخرب بيتك.

المرأة 3: سي متولى.١.

متولى: ما تسيبوني في حالي بآه.. هي الحارة

دي ماوراهاش غير الأكل.

قطع

المرآة تشهق. امرأة ثالثة.

يمضى بسرعة وهو في قمة الغيظ.



انشراح تقوم بعمل التدريبات الرياضية للأطفال.

انشراح: واحد اتنین مسافة دوغری .. ثنی،، مد.، نستریح شویة بأه ونجری فی مكانتا.. ياللا.١.

> عبد الفضيل الناظر .. يمر وهو ينظر نحو عالفضيل ازيك يا أبله انشراح ١٠. انشراح بإعجاب،

انشراح: الله يخلى حضرتك يا حضرة الناظر. ع الفضيل: انت خاسة شوية.

انشراح: ما هو من التدريبات يا حضرة الناظر.. أنا مدرسة ألعاب.

ع الفضيل: وليه كده.. ما تربربي شوية يا أبله

انشراح: أربرب.

ع الفضيل: قصدى يعنى عشان تقدرى تكملي الحصص بدال ما تدوخي وتقعي. استمرى في التدريبات.

> عبد الفضيل يحضر كرسي وهو يتابع حركات انشراح الرياضية.

انشراح: حاضر .. حاضريا حضرة الناظر. ع الفضيل؛ يعنى جايه متأخرة النهاردة. انشراح: كنت في النقابة.. ما أنا قايلالك يا حضرة الناظر،

ع الفضيل: انت مش ح تبطلی شكاوی يا أبله انشراح.. ما تركزي في شغلك وتخليكي في حالك. انشراح: ما هوده اللي مبوظ البلد .. كل واحد بيقول ياللا نفسي.١.

#### قطع



الكاميرا تستعرض مصر القديمة وميدان السيده عيشه.. لنرى عربة «طاجن متولى».. وهى عربة خشب بسيطة .. يظهر فيها الطعام ونرى خلف العربة لافتة مكتوب عليها متولى الطباخ.. ينتخب السيد الريس مدى الحياة. "بصله" مساعد متولى وهو شاب قصير دماغه كبيره بعض الشيء.

متولى ينظر في العربة يتمم على الحلل.

بصله: إيه اللي أخرك يا أسطى . . بتوع الحي عدوا وكانوا عاوزين يشيلوا العربية.

متولى: وعملت إيه؟١.

بصله: حلة الحي كانت جاهزة.. لقيتها واديتهالهم .. وح يعدوا عليك بالليل.

متولى: وفين حلة التأمين الصحى.

بصله: ما هو الراجل جه وسأل على الشهادة الصحية.

متولى: واديتله الشهادة ١٤.

بصله: لأ.. اديتله الحلة.

متولى: فيه حلة ناقصة ياد يا بصله.. حلة البلدية راحت فين ١٤.

بصله: اديتها لبتوع الكهربا.. الظاهر حد شكك شكوى في الكهربا عشان بتسرق الكهربا من العامود.

متولى: والبلدية أما تيجى ح نعمل إيه معاهم ياد،١ بصله: أنا بجهز لهم طاجن عكاوى حاكم البلدية بتحب العكاوي.

> يقترب منهما رجل ضبرير يرتدى نظارة سوداء.. شحاته.

شحاته: نهارك حليب يا أسطى متولى. متولى: بص يا عم شحاته.. إنت أديلك أربع سنين تعدى الصبح تدعيلي وتاخد اللي فيه القسمه، وكل ما تدعى الدنيا تتكركب فوق دماغ اللي خلفوني.. حط له ياد يا بصلة حتة لحمة فى رغيف.

شحاته: إلهى يا رب يفتحها في وشك يا متولى.

متولى: خلاص بأه يا عم شحاته.

شحاته: الهى ربنا يعمر بيتك يا متولى یا طیب یا جدع.. نهارك نادی مادام استفتحت بياح تشوف الخير الليح ينزل يرف عليك.

ر. البلدية: شيل يابني الحاجة دى وطلعها ع العربية.

متولى: الله يخرب بيتك ياعم شحاته.

سيارة البلدية والعساكر ينزلون منها أمام عربة متولى.

قطع





حازم يقترب من الريس.

حازم: أنا شايف إن سعادتك ماتروحش الزيارة دى يافندم.١.

الريس؛ ليه ياحازم.. أنا لازم أروح أشوف بنفسى إيه اللي تم١٠.

حازم: كل توجيهات سعادتك اتنفذت يافندم بالحرف الواحد... بس أنا شايف إن الأسلم إن سعادتك ماتروحش لدواعي أمنية.

الريس في ضيق يتنهد يائسًا.

قطع



الريس في البيت والكاميرات تصور الزيارة. الريس يدخل لنجد فلاحًا تبدو عليه الطيبة. يقبله.. ثم نجد فلاحة بسيطة تسلم عليه في خجل.

الريس، إزيك يا بسطاوي.١.

بسطاوى: الله يسلمك ويحميك من كل ردى يا سيادة الريس.

الريس: إنت متجوز يابسطاوي.

**بسطاوی:** آیوه یا ریس.

الريس: عندك كام عيل،

بسطاوى: خمسة يا ريس.

الريس: ماتخف شوية يابسطاوى... ومين دى يابسطاوى.

الفلاح: دى مسعده مراتى يا سيادة الريس.

الريس: إزيك يا مسعده.

مسعده: ربنا يخليك يا سيادة الريس.

الريس: إيه.. إنتوا بُخلا والا إيه.. مش

ح تشربونا شای.

مسعده: جاهزيا سيادة الريس-

نرى لقطة لرجال الأمن وهم يعملون الشاى. مسعدة تأخذ الصينية منهم.

وتدخل حيث الريس يتكلم مع الفلاح.. وتضع الشاي.

بسطاوى: الحمد لله يا ريس إحنا كنا فين وبأينا فين .. ده إحنا كل يوم بنصلى وبندعيلك.١٠

الريس يتناول كوب الشاى ويرتشف منه رشفه الريس، الله ينور عليكى.. الشاى بتاعك مظبوط قوى . . ده أحلى من الشاى اللي بأشربه في بيتنا.١.





مذيع النشرة ونرى فيديو للرئيس جالسًا يضحك مع الفلاح بسطاوى ومسعده.

المذيع: وقد تفضل السيد الريس بزيارة ودية الأحد الفلاحين وزوجته، وتناول معهما كوبًا من الشاى وكانت الجلسة ودية تمامًا.



كريم مصباح يضع ملفات أمام الريس والتليفزيون شغال بصوب واطى جدًا.. لنرى كوندليزا على الشاشة.

تمثل به مسعده.. دور فتاه روشه جدًا. الريس يندهش حيث يراها.

ينظر إلى المسلسل مُدققاً.

الريس ينظر إلى التليفزيون فيجد مسلسلا..

الريس: الوش ده مش غريب عليّا ياكريم.. مین دی؟.

الريس: اقلب لنا المحطة دى ياكريم.

كريم: يا فندم سيادتك بتشتغل من الصبح

لغاية دلوقت.. 14 ساعة كتير قوى يا فندم.

كريم: تلاقيها ممثلة جديدة يا فندم. الريس: ممثلة جديدة إزاى.. دى مسعده

كريم: مسعده مين يا فندم.

الريس: مرات بسطاوى اللي عملت لي الشاي وأنا في سمالوط في الزيارة الأخيرة.

كريم: معقولة يا فندم؟١.

الريس: جايبينلي واحده كومبارس تمثل عليا إنها فلاحه من الشعب.

كريم، أكيد يا فندم.. اضطروا يعملوا كده لإجراءات أمنيه.

الريس: وبسطاوى .. يطلع مين هو كمان .

كريم: عبد السلام الدهشان من المسرح القومى يا فندم. الريس ينفخ في غيظ.



متولى نائمًا على الأرضى وانشراح أيضًا وبينهما الأطفال وتفيدة أيضًا ويتفرجان على التليفزيون .. وعبد الحليم حافظ يغنى .. تعالى . . ضمنی، قرب، کمان قرب، هنا جنبی وهات شوقك على شوقى وهات حبك على حبى . . الكل نائم إلا هما سهرانان من فرط الشوق. متولى يمد يده محاولا حتى الإمساك بيدها.. دون أن يشعر أحد.. وانشراح تخشى أن يستيقظ أحد.. الأم تتقلب.. يبعدان أيديهما بسرعة.

أحد الأطفال يصرخ فجأة.. لا.. لا (كان يحلم).

متولى يُصاب بالذعر ويبعد يده بسرعة.

متولى: ده حرام ، اللي بيحصل ده مايرضيش ربنا.. ده أنا أيام الخطوبة كنت بأعرف أخطف لى بوسة.. مسكة إيد.

انشراح: أسكت يا متولى.. بكرة في شقتنا ح تعمل اللي إحنا عاوزينه.

متولى: شقتنا.. هي فين شقتنا دي.. إحنا ح نطلع على المعاش قبل ما نستلمها.



الريس يتفقد مشروع الإسكان الشعبى وبجواره وزير لبناني.

الريس: أهم حاجة نسكن الشباب. ليه.. لأن الشاب من دول جواه طاقة.. لو ماطلعتش.. ينفجر.. أنا كنت شاب وعارف.

الموزير اللبنانى: طبعًا فخامة الريس.. طبعًا.

الريس عندكوا مشكلة في إسكان الشباب يا سيادة الوزير . ١.

الموزير اللبناني: لا.. عندنا مشكلة في الشباب يا فخامة الريس.. تعداد المواليد الذكور أقل من المواليد الإناث خمس مرات. الريس: طيب ما تيجوا تاخدوا شباب من عندنا.. عندنا شباب هايل هنا في مصر.



قاعة فاخرة في الرياسة.

الريس جالسًا مع وزير الخارجية اللبناني.. في جلسة ودية.

الوزير: فخامة الريس. الأمة العربية كلها بتشيد باللى فخامتك بتعمله. ما فيه حل أمامنا إلا إن الحكام يقربوا من الشعوب عشان نرجع تانى نقف فى وجه الإمبريالية الغربية.

الريس: بقولك إيه ياسيادة الوزير... أنا... أنا عاوز أسألك سؤال.

الوزير: أؤمر فخامة الريس.

الريس عندكوا.. بينزل الشارع.

الوزير: أيوه فخامتك طبيعي.... بينزل ياكل

فى المطاعم .. يقعد ع الروشه يشرب أرجيله ..

عادى... ما فيه مشاكل.

الريس: طيب وأمن الريس.

الوزير: أمن الريس.. هو حب الناس كلها

لفخامته... ده في مرة الحريري.

الريس: هومفيش غير الحريرى اللي تديني

مثل بيها.

غاضيًا.



حازم وكريم يدخلان على الريس.

كريم: صباخ الخيريا فندم.

الريس: اقعد يا كريم.. اقعد يا حازم.

حازم: خيريا فندم.

الريسى: معلش جبتكوا بدرى شوية بس الصحيان بدرى مش وحش١٠.

حازم؛ لا بدرى إيه يا فندم.. الساعة بأت خمسة ونص الصبح.

كريم: أنا حاسس إن سيادتك مشغول بحاجة يا سيادة الريس.

الريس: قريتوا جرايد المعارضة.

كريم: قريتها يافندم.

الربيس: أنا ماقريتهاش... بس أنا حاسس إن الناس مش مرتاحه.. فيه حالة شكوى عامة.

حازم: الناس اللي بيكتبوا الكلام ده يا فندم أقلام مُغرضة بتحاول تعطل مسيرة التنمية اللي سيادتك بدأتها.. وبتستغل هامش الديمقراطية اللي سيادتك....

الريس: حازم.. أنا مش جايبك عشان أسمع الكلام ده.. عشان فيه جرايد كتير كاتبه كده برضه.. أنا مشح أقبل أن علاقتي بشعبي تكون من خلال كلام مكتوب ولا تقارير بتجيلى.. أنا لازم أعرف كل حاجة بنفسى.. وأنا قررت خلاص أناح أعمل إيه١٤.

مقاطعًا.

**کریم:** خیریا فندم؟۱.

الريس، يوم الاتنين اللي جاي.. بعد ما أخلص الشغل.. أناح أنزل.

حازم: تنزل فين سيادتك.

الريس: الشارع.

رد فعل على وجه حازم وكريم وهما في قمة الدهشة.

أيوه.. مستغربين قوى كده ليه؟١. هوه أنا مش مواطن زى أى مواطن من الشعب.. من حقى أنزل.. أروح السيدة عيشة.. أقعد على قهوه.. أتكلم مع الناس ويكلموني.

> حازم يبتسم يظن أنها نكته.. ثم كريم يبتسم.. ثم يضحكان.. والريس ينظر نحوهما وقد تجمدت ملامحه.. ثم يصرخ فيهما.

> > يصمتان في خوف.

أنا ما بقولش نكته عشان تضحكوا.

أناح انزل الشارع.. وح امشى لوحدى.. ولوفيه أى إجراءات أمنيه اتعملت.. مش ح يحصل كويس.. أنا مش عاوز أى حد معايا في الزيارة دى.. مفهوم.١.

رد فعل على وجهيهما.



قاعة مجلس الوزراء .. ونرى حازم وكريم جالسين في القاعة.. ونرى رئيس الوزراء.. والوزراء.

حازم: أنا حاولت شخصيًّا أكتر من مره مع سيادة الريس.. بس سيادته مصر على موقفه.. ح ينزل الشارع يوم الاتنين.. مفيش فأيده.

كريم: الحقيقة أنا مع سيادة الريس في قراره التاريخي ده.. الناس كلها بتحب الريس ولولا هوواثق من كده ما كانش اتخذ القرار الجرىء

ر. السوزراء؛ يا كريم بيه .. الحكاية مش بالسهولة دى .. وعشان كده أنا باقترح إن إحنا نعمل يوم الاتنين عُطلة رسمية.. عشان الشوارع ع الأقل تهدا شويه.

كريم: وح نقول العطله دى بمناسبه إيه؟١.



لقطة عامة من الخارج لمبنى وزارة الأوقاف. قطع



وزير الأوقاف يتكلم في التليفون.

الوزير: أنا أقترح نعمل يوم الاتنين اللي جاي عيد.. ونسميه عيد الوحدة الوطنية.. والناس في الأعياديا بتسافر.. يا بتقعد في البيت.



لقطة عامة من الخارج لمبنى وزارة الداخلية. قطع



الوزير وأمامه حازم.

الوزير: لا يا فندم ده حل وسط ، أنا لا يمكن أوافق عليه بصفتى مسئول شخصيًا عن أمن الريس أنا لن أقبل بأقل من حظر تجول في اليوم ده.. البلد فيها قانون طوارئ ومن حقى أن أعمل حظر تجول في أي وقت.

حازم: الريس مش ح يوافق... هوه رافض إن الأمن يتدخل يامعالى الوزير.



قاعة اجتماعات حيث يجلس مجموعة من الوزراء ورئيس الوزراء وحازم وكريم

و. الشباب: لوسمحتولي يا فندم.. أنا عندي اقتراح.. احنا نجيب منتخب البرازيل يلاعب المنتخب القومي.. وحسن شحاته جاهز.. مباراة مهمة زى دى حاتخلى الناس كلها تروح الاستاد.. أو يقعدوا قدام التليفزيون والشوارع ح تفضا خالص.

كريم: مش كل الناس مهتمة بالكورة يا سيادة الوزير.

و. الإعلام: أنا أقترح إن إحنا نعمل حفلة في الصحرا.. في طريق مصر إسكندرية.. نجيب فيها نانسى عجرم وهيفاء وهبى وروبى .. ونعمل الحفلة مجانا.. مصر كلها ح تلاقيها هناك.

و- التعمير: من فضلك يا سيادة الريس هو الريس ح ينزل يروح فين ١٤٠.

حازم: معرفش.. هو قال كلام كده.. السيدة عيشة.. تقريبًا.

و- التعمير: لوإديتوني الإمكانيات سعادتك.. إحنا ممكن نبنى السيدة عيشة ديكور في مدينة الإنتاج الإعلامي وسيادة الريس ييجي

ر. السوزراء: كل ده كلام ما ينفعش مع الريس.

و. الصحه: مفيش غير حل واحد يا فندم.. إحنا نقول إن يوم الإتنين الجاى الساعة إتنين ح يحصل كسوف شمسى مفاجئ.. وح تصدر من الشمس أشعة مُضرة ممكن تسبب العمى.. وح نناشد السادة المواطنين أنهم يقفلوا الشبابيك من الساعة 2 للساعة 8 بالليل. ر. الوزراء: واللهى أنا شايف إن ده حل معقول جدًّا.



الشيخ وهو يلقى خطبة في الجامع، في الميكرفون.

الشيخ: سيسألون يوم القيامة عما فعلوا بهذا الشعب.. كان عمر بن الخطاب رضى الله عنه.. ينزل متخفيًّا ليتفقد أحوال الرعيَّه.. أما الآن فالناس جياع.. عرايا.

> ونرى متولى جالسًا ومعه بصلة وآخرين في المستجدء

متوثى: آه والله يا عم الشيخ.. يسلم فمك.١. الشيخ: ولا أحد من المسئولين ينظر إليهم يا رئيس الجمهورية.. إن كنت أنت قدرنا.. فألطف بنا.. ألطف بنا.

> متولى يقوم منسحبًا مذعورًا ووراءه الآخرون. قطع



لا يزال صوب الشيخ في الميكروفون.

بصله: ما تلطف بينا إنت كمان يا أسطى متولى.. ولازمته إيه الشغل النهاردة بس.. إنت ماسمعتش اللي قالوه في التليفزيون .. اللي ح يخرج ح يعمى.

متولى: عليا النعمه ما أقفل باب رزقى لما يحصل إيه

بصله: الناس كلها مروحين بيوتهم زى ما أنت عارف.. مفيش زباين.

متولى: ما توجعليش دماغى ع الصبح.. كسوف مش كسوف أنا فاتح وشغال.. ح نجيب قسط الشقة منين .. لو خايف على نظرك روح .. أنا بقولك أهوه.

بصله: لا.. أنا عينيا مزغللة يا أسطى.. أنا ماشى.١.

> بصله يجرى مبتعدًا ومتولى ينظر نحوه في غيظ.



باب القصر يُفتح. ثم نرى الريس وحده خارجًا مرتديًا جاكيت خفيفًا على قميص مفتوح.. وحذاء خفيف ونضارة سوداء.

يبدو وكأنه يلتقط أنفاسه.. الريس يمشى في الشارع المجاور لشارع القصر.. فلا يجد أحدًا على الإطلاق.

لقطات مختلفة للرئيس.. في الشوارع وحده ولا أحد من الشعب في الشارع.. والبيوت كلها مغلقة كأن البلد مهجورة.

وهو في قمة الاندهاش.. حالة من الخواء رهيبة.. يمكن أن نجده واقفًا وحده يتأمل تمثال رمسيس.. ولا مخلوق واحد في الميدان.

الريس يخرج تليفونه المحمول.. يطلب رقمًا.

الريس: آلو. أيوه ياحازم. الشعب فين١٤. انتوا وديتوا الشعب فين يا حازم.. 75 مليون ما ألقاش منهم ولا واحد .. لا مش راجع ١٠. ومش عاوز حد يجيلي١٠٠.

يغلق التليفون.

يجد تاكسى .. يشير له .. التاكسى يقف . الريس يركب بجوار السائق.





في التاكسي.. السائق دون أن ينظر للرئيس.

الريس ينظر إلى الطريق.

السائق ينظر نحو الريس.

الريس يخلع النظاره.. السائق يفرمل بقوة ويترك التاكسي ويخرج جاريًا مذعورًا والريس ينزل من التاكسى... يحاول أن ينادى عليه... ولكن الرجل يفر من أمامه وكأنه رأى شبحًا.. الريس ينظر في يأس.

الريس يرى أتوبيس نقل عام.. يقف في محطة قريبه فيجرى ويطلع إلى الأتوبيس.

السائق: على فين؟١.

الريس: أي حته... وديني السيدة عيشه.

السائق: حاخد تلاتين جنيه.

الريس: ليه١٤.

السائق: عشان ح أرجع فاضى.

الريس: هية البلد فاضية كده ليه؟١.

السائق: حد عارف لها حال.. يوم تبأه زحمة موت.. والنهاردة أهيه ولا كأننا في صحرا.. وقف حال يا باشا .. كل يوم يطلعولنا بحاجة.

الباشا أنا زى اللى شفته قبل كده.

الريس: يابني إنت ابني ابني ابني ابني ابني فين؟



داخل الأتوبيس.. الريس في زحام الأتوبيس... وهم يدفعونه ولا يشسعرون أنه بينهم والكومساري.

جميع الركاب يرتدون نظارات سوداء.

الكومسارى: آخر محطة المحطة اللي بعد الجاية.. وح نجرش

أحد الركاب: ليه يا أسطى.. أمال ح نروح بيوتنا إزاي ١٤.

الريس: أه صحيح.. الناس دى تروح بيوتها

الكومسارى: خليك في حالك إنت. مش كل واحد يطلع لى بكلمة.

الريس، ده أتوبيس نقل عام، هوه أتوبيس

النشال: على إيدك يا أسطى.١.

الكومسارى: بقولك إيه؟. يا نهار أسود..

الريس.١.

الركاب: بالروح بالدم ح نكمل المشوار.

أحد النشالين ينط من الأتوبيس. الكومسارى ينظر نحوه.. ثم يصرخ.

ويقع مغشيًا عليه.. وركاب الأتوبيس جميعًا يهتفون في صوت واحد.

ثم ديزولف.



النشال يخرج المحفظة... ويفتحها يرى البطاقة... فيجد صورة الريس ويقرأ في الخانة.. المهنة: رئيس جمهورية مصر العربية. النشال يلقى بالبطاقة.. ثم يلقى بنفسه في النيل. قطع




لقطة للأتوبيس خالى تمامًا... والريس وحده في الأتوبيس يمسك بالحديده.



نرى الريس أمام الجامع .. حيث لا أحد يصلى .. ينظر باستغراب

### قطع





الشيخ يصلى وحده.. قبل نهاية الصلاة يدخل الريس ويجلس خلفه... وينهى الشيخ الصلاة.

الريس: حرمًا يا عم الشيخ.١. الشيخ: جمعًا.

> يراه يشعر برعب.. يفتح الميكروفون ويقول فيه ونسمع الصوب وصداه. يشير نحو الريس باحترام. ثم يلتفت إلى الريس.

وأطيعوا الله وأطيعوا الرسول وأولى الأمر منكم. دى فرصة سعيدة ياسيادة الريس. تحب سيادتك تصلى العصر دلوقت.١.



المقهى خال تمامًا من الرواد.. إلا شحاته الأعمى جالسًا على المقهى.. يصفق ولا أحد يجيب.

الريس يقترب منه... ويجلس بجواره.

شحاته: يااخواننا... فيه إيه؟. عمال أسقف م الصبح.

لا أحد يرد عليه.

الريس: انت عاوز إيه ١٤.

شحاته: انت فين من الصبح.. انتوا مالكوا النهاردة.. عاوز حلبه حصا.

الريس: بس أنا.. أنا. أنا زبون.

شحاته: لامؤاخذة ياحضرة.. العتب ع النظر.

ديزولف.

الريس يدخل بالحلبه الحصا ويعطيها للأعمى.

الريس: البلد كلها هاجرت وإلا إيه النهاردة؟ شحاته: خايفين من العمى يا سيدى .. قال يعنى من الهنا اللي شايفينه.. المفروض إن أنا اللي أخاف.


الريس: وتخاف من إيه؟١.

شحاته: ما هي البلد كلها لو اتعمت زي ما بیقولوا.. اللی زیبی مش ح یعرفوا یاکلوا عيش.. إنما.. أنا زى كده ما أكون قابلت حضرتك قبل كده.. الصوت مش غريب عليا. الريس يحاول أن يغير الموضوع.

الريس، إنت اتغديت.

شحاته: اتغدیت. هی سهلة کده. الظاهر انك مش عایش فی البلد دی. أنا علی لحم بطنی من الصبح.

الريس: طيب ياللا.. أنا عازمك ع الغدا.. تحب تاكل إيه؟١.





شحاته والريس.. كل منهما يرتدى نظارة سوداء ويتجهان إلى عربة متولى .. (يغنيان) .. ياللا بينا تعالوا.. نسيب اليوم بحاله.

متولى ينظر إلى الريس.. ثم ينظر إلى اللافته.

شحاته: متولى ده يا أستاذ بيعمل طواجن عجب.. أنا مجربه.. فلوسى كلها رايحه عليه.١. متولى: إيه يا عم شحاته.. هوده يوم تيجي فيه.. إنت شايف الشغل ماشي قوى ١٠. ومين الأخ ٠٠ هوه إنت مفيش مرة تجيب لى معاك حد مفتح. الريس: شوفه ياكل إيه وأنا اللي حادفع

الحساب.

متولى: حاضر.. تاكل إيه يا عم شحاته.

شحاته: طاجن كوارع.. وفته.

متولى: الوش مش غريب عليا.

شحاته: هو راجل حسه حلو . يخش القلب

متولى: ده إنت شبهه بالمللى.

ا**لريس:** شبه مين؟١.

متولى: شبه الريس.

شحاته: الهي وانت جاهي تقابله يا متولى وتسلم عليه.

متولى: آه لو أقابل الريس.. ده أنا كنت أقوله على بلاوى.

الريس: ح تقول له على إيه يا متولى؟!.

متولى: ح أقول له اللي بيحصل في البلد من وراه.

الريسى: إيه بأه اللي بيحصل في البلد يامتولي.

متولى: يا عم ما تخليناش ندوس فى الحلل.. خلينا ساكتين.

يضحك.

الريس ينظر إلى اللافتة التي علقها متولى يؤيد فيها الريس.

فيها الريس.

رد فعل على وجه الريس

الريس ينظر إلى الأفق في ضيق.. ثم يزفر في آسي.. مع مؤثر موسيقي.

الريس: أنت بتحب الريس يا متولى.

متولى: بحبه.. ده أنا من حبى فيه انتخبته مرتين.

الريس: إزاى؟١.

متولى، مرة بالبطاقة الانتخابيه بتاعتى، ومرة ببطاقة جوز خالتى الله يرحمه. ده أنا معلق له اليافطه دى وماشيلتهاش من أيام الانتخابات.

الريس: للدرجة دى انت بتحب الريس.

متولى، من ناحية بحبه.. بحبه.. بس لو ماحطيتش اليافطه بتوع الحي ح يشيلوا العربية. الريس، إنما إنت نزلت الشغل يعنى وماخفتش من العمى زى الناس كلها ما خافت.

متولى: ح نخاف من إيه.. قال ضربوا الأعور على عينه.. ما أنت نزلت أهوه أنت كمان ولا عشان ما أنت ضرير.

الريس: ما أنا قلت يمكن أفتح.١.

هات الحساب.

متولى: 42 جنيه.١.

الريس يفتش في جيوبه. لا يجد المحفظة. الريس: إيه ده. المحفظة راحت فين ١٦.

متولى: لا والنبى بلاش الحاجات دى يا عم الحاج. الريس: كانت فى جيبى.. ماتخافش.. فلوسك النهاردة ح تكون عندك.

متولى: هيا ناقصة ع الصبح.. ربنا يسهلك يا عم هوه يوم أغبر من أوله.. ياللا. ياللا اتوكلوا على الله.



الريس داخلاً إلى المكتب وخلفه حازم وكريم.

الريس: إذا كنتوا فاكرين إنكوا فضيتوا البلد عشان تحافظوا عليها.. تبأوا غلطانين يا حازم.

حازم: يا فندم واللهى إحنا...

الريس: فيه واد طباخ اسمه متولى.. واقف على عربية أكل .. الواد ده ييجى يشتغل هنا في الرياسة.. معايا.١.

> حازم في قمة الدهشة والذعر وكريم يبتسم. قطع



متولى: يا حماتى .. صدقينى .. انت منظورة انت وعم صلاح.١.

أم انشراح: وح نعمل إيه يا متولى.

متولى: انت تطلعي من الفجر كده على طنطا تروحي السيد البدوي.

أم انشراح: آه والنبي .. يسلم فمك .. أنا مشتاقاله قوى.

صلاح: اتكلى على الله يا أم انشراح. متولى: وهى ح تروح لوحدها.. ما أنت أخوها ولازم تبأه معاها.

صلاح: والعيال نسيبهم مع أمهم.

متولى: أمهم إيه؟. والعيال كمان قبلكوا لازم يروحوا ياكلوا حب العزيز.. مش كده يا عيال.

الأولاد: أيوه. عاوزين نروح معاكوا.

متولى: وأنا بأه بكرة ح أخلص شغلى وأجى هوا عشان انشراح ماتقعدش لوحدها.

شى الله يا سيد يا بدوى.

العيال يهتفون.

متولى يبتسم في خبث.

انشراح تبتسم.



حفل العيد الوطنى للبلد.، والريس جالسًا فى أول صف وخلفه حازم.. وكريم.. ونرى أحد الممثلين أو النجوم يلقى كلمة للرئيس.

المهثل: لكأن القدر أرسلك إلينا في لحظة فاصلة من تاريخ الأمة.. وكأن سفينة الوطن كانت في حاجة إلى الربان الماهر الذي يصل بها إلى بر الأمان.. أنت الذي قُدت أمتنا إلى الرخاء.. إلى الحرية.. إلى الديمقراطية.

ص متولى: آه لو أقابل الريس كنت أقول له ع اللي بيحصل في البلد من وراه.

الريس: الواد متولى فين.. أنا مش قايل لكوا تجيبوه.

الريس يبدو عليه الملل من الكلمة.

فلاش صوت الممثل.. ونسمع صوت متولى.

الريس يهمس إلى حازم الذى ينحنى عليه.





متولى يكلم انشراح من تليفون في العربية.

متولى: أيوه يا انشراح .. خلاص بأشطب أهوه.. النهاردة للصبح بأه.. باموت فيكي.. القميص البنفسيجي.. آه.. اللي ما حالفنيش الحظ في سنة جواز وأشوفك لابساه.. لدرجة أنى أفتكرت إنك جايباه لحد تاني.. آه ياريت ياأبله انشراح.. مشح اتأخر.

بصلة: واحد بامية باللحمة الضاني

متولى: هما الزباين دول بيعاندوا معايا.. أشمعنى نفسهم اتفتحت الليلادي بس. بصلة : حد يقول للرزق لأيا أسطى متولى. متولى: والرزق اللي في البيت ده أعمل فيه إيه؟١.



نرى الريس جالسًا والعزبي يلقى بأحد مواويله التي تمدح الريس. والريس يبتسم.. ويصفق.

### قطع



انشراح جالسة بالقميص البنفسجي. نرى الريس والعزبي في التليفزيون يغنى له.

انشراح: الإيراد 500 جنيه مرة واحدة.. تصدق أنا اتفاءلت بالليلة دى يا متولى.. لأ.. على مهلك أنا باتفرج على التليفزيون.



متولى يكلم انشراح .. وزحام شديد.

متولى: هيه أمك وخالك صلاح نابرين على الليلة دى .. مصر كلها جاية تاكل عندى .. اسمعی یا انشراح.، شوحی نص کیلو کبدة ونزلى السبت لأبو جورج.. قوليله يحط لك 9 قزايز بيرة مشبرين.. أضربي انت تمانية لحد ما آجي عشان تبأه دماغك حلوة.

قطع




ضاحكة في أنوثة.

انشراح: بيرة.. أنت مجنون يا متولى.. طيب ياللا تعالى إنت بس.١٠.



استعراض وطنى عن إنجازات الريس. فرقة استعراضية.

والريس يبتسم في ملل.. ويتثاءب. ثم ينظر في ساعته.. ويكلم حازم في أذنه. حازم يشير نحو المسرح.. فيقف الاستعراض في منتصفه.. ينزل السلام الجمهوري فجأة ويقف الجميع.





متولى يحمل أكياس الطعام.. ويمضى مسرعًا يشير لميكروباص.. لا يقف.

فجأة تقف بجواره سيارة سوداء .. وبها بعض الرجال الغامضون.

ىنادى عليە.

رجل: يا متولى.

متولى: نعم؟.

الرجل: إركب عاوزينك.

متولى: فيه إيه يا باشا؟١.

ينزل أحد الحراس من السيارة الخلفية.

ويمسك بمتولى ثم يركبه السيارة.

الرجل: بشويش ياأحمد. إحنا مش قابضين عليه.

متولى: خيريا باشا.. أنا عملت حاجة غلط؟.

الرجل: مفيش.. اطمن خالص.

يضعون شريطا على عينيه وتمضى السيارة.

متولى: أهوه أنا كده اتطمنت.



ينزعون الشريط اللاصق من على عين متولى.. الذى يجد نفسه فى حجرة بها مكتب فخم وترابيزة اجتماعات. يجلس كريم مصباح والرجال يحيطون به.

كريم يبتسم في طيبة.

يفتح الباب يدخل حازم حسين.

حازم: هوه ده ۱۶۰.

متولى: أنا عملت إيه يا باشا؟١.

كريم: ما تخافش يا متولى.. أنا مش عاوزك تتوتر.

حازم: ما تسترجل كده ياله.. وتجمد.. حد لمسك .. خدوه.



الكشف الطبى على متولى في شوتات سريعة خاطفة للغاية.

- (1) كشف الأظافر.. والأسنان والعين.. والأذن.
  - (2) يحلقون شعره.
  - (3) يدخلونه حمام ماء ساخن.. وبارد

يصرخ.

متولى: أنا عملت إيه يا باشا؟١. الحراس: اخرس بأه في يومك ١٩.

يدخلون به إلى الحجرة.



متولى ينتفض من الرعب.

كريم: يا حازم بيه.. معلش هوه أصله اتاخد كده على طول وماعندوش أى فكرة. حازم: ما تهدا يابني إنت فيه إيه؟١.

> يدخل عم سليمان.. وهو رجل مُسن تبدو عليه ملامح الضيق والحزن العميق.

سليمان: أيوه يا باشا؟.

حازم: شوفه يا عم سليمان إنت...

متولى: أنا تحت أمرك يا عم سليمان.. أنا واقع في عرضك يا عم سليمان.

سليمان: اعمل لي مسقعة يابني.

متولى: إيه؟١١. بأه كل المرمطة دى عشان أعملكوا مسقعة ١٩.

> حازم: اشتغل من غير رغي.. نفذ الأمر.

رد فعل على وجه متولى.

سليمان يأخذ متولى لنرى المطبخ لأول مرة في الحجرة.. مطبخ مفتوح. بسرعة شديدة متولى يعمل المسقعة.

أحد الحراس يناولها لعم سليمان الذى يتذوق قطعة صغيرة.

سليمان: شوربة عدس.

متولى: أنا أعرف 26 نوع شوربة عدس یا باشا.

سليمان: وريني.

متولى: عينيا يا عم سليمان.

نفس الشيء يتكرر .. ومتولى ينفذ الأوامر في حركة سريعة وشوتات سريعة وسليمان يتذوق ويعلق.. على موسيقي موحية راقصة سريعة متلاحقة.. تتخللها أوامر سليمان.

سليمان: الملح كتير.

زود الكرفس.

زود ورق اللوري.

كل هذا ومتولى يقوم بكل ذلك بهمة ونشاط وتوتر شدید.. ویمکن أن نری الرجال یأکلون باستمتاع في النهاية.

**كريم:** إيه رأيك يا عم سليمان.

سليمان: مش بطال.

حازم: يعنى ينفع يا عم سليمان؟.

سليمان: ينفع.. ماشي.

سليمان تدمع عيناه ويترك الحجرة.. وحازم يخرج خلفه .. للحسرس .

كريم: سيبونا لوحدنا.

متولى: فيه إيه يا باشا؟ ١١١.

كريم ينظر نحو متولى ويقترب منه ويضع يده على كتفه برقة،

**گریم:** متولی.. إنت بتحب مصر یا متولی؟.

متوثى: طبعًا يا باشا.

كريم: يعنى لو فيه مهمة وطنية عندك مانع إنك تأديها؟.

متولى: أنا رقبتى فدا مصريا باشا .. بس أنا.. ما أعرفش أعمل حاجة في الدنيا غير

كريم، ما هو ده اللي إحنا عاوزينك فيه. متولى: عاوزينى أطبخ لمصر كلها يا باشا؟١١. دول 75 مليون.

> كريم يقف، وينظر نحوه في صمت وهو يتفرس ملامحه.

كريم: متولى.. إنت وقع عليك الاختيار عشان تكون طباخ سيادة الريس!. **متولى:** الريس مين١٩.

كريم: السيد رئيس الجمهورية.

رد فعل على وجه متولى ..

وهو في حالة من الذعر والدهشة والفرح

الممزوج بعدم التصديق.

متولى: أنا يا باشاالا.

كريم: أيوه إنت يا متولى.

متولى: إيدك أبوسها يا باشا.. أنا تحت أمر سيادة الريس.. أنا.. أنا مش عارف.. أنا باحلم يا باشا.. ألطشنى بالقلم يا باشا.. فوقنى.. عاوز أصدق اللى باسمعه؟ ١.

كريم: تمالك أعصابك يا متولى. اهدا خالص. أهم شيء إنك تعرف خطورة وأهمية اللي إنت داخل عليه.

متولى: أنا بحب الريس قوى يا باشا.. عليا الطلاق من بيتى أنا انتخبته.

كريم: أهم شيء.. مفيش مخلوق يعرف إنك شغال في الرياسة.. مفهوم.. ولا حتى انشراح مراتك.. ولا تفيدة حماتك.. ولا صلاح خال مراتك.. ولا حد في الدنيا ياخد خبر.

متولى: أمال ح أقول للناس إن أنا شغال فين؟.

كريم: زى ما إنت شغال على عربيتك.. وح تمضى استلام عمل من النهاردة.

متولى: أمضى فين يا باشا؟١.

**كريم:** هنا.

متولى: طول عمرى حاسس إن ربنا مخبيلى حاجة كبيرة قوى ..

إنما لامؤاخذة ياباشا.. هوه المرتب كام؟.

**كريم:** 350 جنيـهًا.

متولى: كسام ١٤.

متولى يأخذ العقد.

وهويبكي.

رد فعل على وجه متولى.

كريم: فيه حاجة يا متولى.. المرتب مش عاجبك.

متولى: دول يغرقوني يا باشا.

كريم: ده الأساسي ممكن بالحوافز والعلاوات توصل لغاية 800 جنيه.

ده الوزير في الحكومة مرتبه 2000 جنيه.

متولى: ده الأساسى.

كريم ينظر نحوه بارتياب.

قطع



متولى يمشى منكسرًا وهو يكلم نفسه في حيرة.

متولى: 350 جنيه ما يكفوش. 350 جنيه ما يكفوش.

> يرى صنورة الريس وهو يحيى الجماهير.. يتوقف عن الكلام مع نفسه في الرعب.

بس تتقضى يعنى.



متولى محبطًا.. يمر أمام محل أبو جورج.

متولى: مساء الخيريا بوجورج. أبو جورج: التسعة بيرة وصلوا فوق يا أسطى متولى.

متولى: ابعت لى صندوق يابو جورج.



يفتح الباب ويدخل مُحبطًا.

انشراح مرتدية قميص النوم ونرى قزازات البيرة ملقاة فارغة في كل ركن من البيت.

يدخل إلى حجرة النوم.

انشراح: لسه جای یا متولی ۱۱. ده اللی ح أخلص وأجيلك هوا؟١١.

متولى: سيبينى يا انشراح فى حالى.. أنا روحي في مناخيري.

انشراح: ماله الراجل ده؟١١.



متولى نائمًا وهو يتقلب في قلق وتوتر شديدين وهو يسمع صوت كريم مصباح.

انشراح تقترب منه في حنان وتربت عليه.

صر. كريم: 350 جنيه في الشهر.. 350 جنيه في الشهر،

انتسراح: أنت بتكلم نفسك يا متولى.. ح تتعدل ياله.. وح أخلفلك دستة القرود اللي إنت عاوزهم.

متولى: أنا باقول نستنى شوية يا انشراح عشان الأيام اللي داخلين عليها شكلها كده ناشفة شوية.

متولى يعطيها ظهره.

انشراح تضربه.. ثم تحاول تقبيله ثم قطع على التليفزيون وبه النشرة التي تقول . حضر السيد الريس اليوم احتفال العيد الوطني. متولى يدفعها بعيدًا عنه.



متولى داخلاً إلى مطبخ الرئاسة من المدخل الخلفى لبيت الريس.

الحرس يفتشونه.. ويدخل تحت جهاز وهو في قمة الرعب.



يدخل متولى وهو في قمة الذعر، يجد عم سليمان بانتظاره.. لا يزال عبوسًا متضايقًا.

سليمان يمسح دموعه بكبرياء.

سليمان: إنت متأخر خمس دقايق.. المواعيد هنا عسكرية.. فيه انضباط.

متولى: معلش يا عم سليمان.. أنا ما نمتش طول الليل.. رجليا بتخبط في بعضها ومش قادرة تشيلني.

سليمان: شوف يابني .. عشان تكمل هنا لازم كل حاجة تكون مظبوطة بالمللى.. نص جرام ملح يعنى نص جرام ملح مش جرام إلا ربع.. مفيش بالبركة.. إنت فاهمنى طبعًا.. الوجبات المُفضلة لسيادة الريس هي الوجبات المُفضلة لأى مواطن عادى.. أناح استنى معاك كام يوم لحد ما تحفظ الشغلانة وتاخد عليها.

متولى: أبوس إيدك ما تسيبنى يا عم سليمان. الله (١١. إنت بتعيط يا عم سليمان ١٩٠٠

سليمان: لأ.. ما باعيطش ولا حاجة.. أصل الواحد لما بيسيب مكان أخد عليه وعاش عمره فيه بتحز في نفسه.

متولى: طبعًا إنت وصلت في المرتب جامد يا عم سليمان.. ما إنت قديم هذا بأه؟. سليمان: الحمد لله المعاش كويس يقضى ويفيض. متولى: وصلت كام يا عم سليمان؟. سليمان: أنا مرتبى 480 جنيه.

هامسًا في رعب.

متولى: بعد السنين دى كلها يا عم سليمان؟١. ودول يعملوا إيه؟١.

سليمان: يعملوا لو إنت عاوز وحابب وراضي ومبسوط يا متولى .. أنا بقالى 12 سنة مع سيادة الريس.. عيالى كبروا واتجوزوا وخلفوا.. ومفيش مخلوق عرف إنى كنت طباخ الريس.. كنت باجى كل يوم يا متولى يابنى .. وأنا حاسس إنى باعمل حاجة مهمة قوى.. أنى بأدى عمل وطنى .. ربنا يوفقك يابنى.

> سليمان يُخرج منديلا ويمسح دموعه.. ومتولى في قمة الإندهاش.

> > يدخل كريم مصباح.

ينهض متولى.

رد فعل على وجه متولى مفزوعًا. مبتسمًا.

**کريم:** متولي؟.

متولى: كريم باشا؟.

كريم: تعالى عشان ح تقابل السيد الريس.

متولى: دلوقتى؟!!!!.

**كريم:** أيـوه.

متولى: طيب ما تأجلها شوية يا باشا.. ح أخشع الريس بإيدى فاضية كده؟١.



الكوريدور المؤدى إلى حجرة السفرة التي يأكل فيها الريس أبواب مغلقة وبودى جاردز يطلعون مما يزيد رعب وتوتر متولى.. وكريم مصباح معه.



الريس جالسًا بجوار المائدة حيث مائدة حجرة بها ترابيزة سفرة .. وأثاث عريق مهيب.

كريم وبجواره متولى يكاد يسقط من طوله.

يبكى من فرط الخوف.

كريم: متولى .. الطباخ الجديد يا سيادة الريس.

الريس: إزيك يا متولى؟.

متولى: الله يخليك يا ريس.

الريس: مالك؟١.

متولى: بس.، أصل.، هيبة سعادتك يا ريس..

الريس: إنت متجوز يا متولى؟.

متولى: أيوة يافندم.

الريس: وعندك عيال؟.

متولى: لسه يا ريس.

كريم: أصله عريس جديد يافندم.

الريس: طيب ما تشد حيلك بأه.

متولى: نخلف فورا يا فندم.

الريس: ح تأكلنا إيه النهاردة؟.

متولى: الجدول يافندم.. النهاردة عاملين..

الريس: ولا جدول ولا حاجة.. أنا عاوز شوية

شوربة عدس.، اتفضل.

ضاحكًا.

متولى يمشى ويسقط على الأرض من فرط الرعب ثم يقوم.. والريس يبتسم.





متولى يخبط رأسه. متولى يلطم على وجهه.

يسقط من طوله.. عم سليمان يضربه ويفيقه.

يرى عم سليمان.

يبدأ سليمان في توجيهات كيفية عمل شوربة العدس لمتولى الذي يُنفذ ما قاله له وكأنه يتحرك بالريموت مع موسيقي وطنية حماسية.

متولى: شورية عدس. شوربة عدس بتتعمل إزاى يا رب.. ده.. ده أنا كنت بأعمل 26 نوع شوربة

إلحقنى ياعم سليمان .. نسيت شوربة العدس ياعم سليمان!١.

سليمان: فوق يا متولى.. فوق. إجمد بأه وتمالك أعصابك يابني .. ما تخافش .. أنا حصل لى كده أول يوم اشتغلت فيه مع سيادة الريس.. يابني الريس بيشرب شوربة عدس زي أي شوربة عدس عادية جداً .. قوم يا متولى .. ح تعمل شوربة العدس وح تقدمها بإيدك لسيادة الريس.. قوم.. اشمعنى لما بتقف على العربية في الشارع بتعمل البدع.. إنت ما تعرفش تطبخ غيرع الرصيف؟١. متولى: يا عم سليمان أنا لما كنت باطبخ للشعب ما كانش بيهمني .. إنما لما بأيت بطبخ لسيادة الريس.. خايف أغلط.. أزود ملح.. أزود فلفل.. شوية كزبرة ييجوا غلط أروح في ستين داهية. سليمان: اسلق العدس.. افركه.. صفيه.. افرك الجزر.



متولى يحمل سرفيس الشوربة وهو يرتعش للسيد الريس.. ويضعه أمامه.. ويتسمر في

مكانه.. ثم يغادر.

الريس يتذوق الشوربة.

كلوز لمتولى وهو في قمة الرعب.

BC الريس يبتسم.

BC متولى يبتسم.

فجأة.. تتجمد ملامح الريس.

متولى يُصاب بهلع.

مداعباً.

الريس: استنى تعالى هنا.

الريس: امسك دول يا متولى.

متولى: ربنا يخليك يا سيادة الريس.

الريس، دول 42 جنيه.

متولى: بتوع إيه ياريس.

الريس: أنت بتشوف عم شحاته يامتولى..

أخباره إيه دلوقت.١.

متولى يكاد يفقد النطق.

متولى: هو .. سعادتك .. أصل .. يا نهار أسود ..

أنا ماقصدتش ياريس١٠.

يلطم على وجهه ويسقط مغشيًا عليه. الريس يضحك أثناء اللطم.





يدخل حازم حسين.

حازم؛ إنت كنت واقف بتعمل إيه قدام سيادة الريس؟.

متولى: أصل يا حازم بيه..

حازم: تحط الأكل وتمشى على طول.. إنت ح تقف تتفرج على سعادة الريس وهو بياكل.. هو عم سليمان ما لقنكش؟١٠

متولى: حاضريا باشا.



متولى الطباخ يضع الطعام أمام الريس في أوقات مختلفة وأزمنة مختلفة مما يعبر عن مرور وقت وتوطد العلاقة.

دون أن يبدو أى حديث بين الريس ومتولى.. يضع الطعام ويجرى من أمامه دون أن ينظر إليه مجرد نظرة طبقا لتعليمات حازم.. الريس

مع الشعب بطريقة مختلفة تماما.



متولى يعطى انشراح مصروف الشهر.

ينتفض.

يضع السماعة.

يصرخ فيها.

لحظة صمت.. ثم متولى يخبط على رأسه بيده.

ا**نشراح:** إيه دول ١٤.

متوثى: مصروف الشهريا انشراح.

انشراح: إنت بتودى فلوسك فين يا متولى؟١. شهر طویل عریض.. ما تطلعش فیه غیر بالکام ملطوش دول.. ليه الناس بطلت تاكل.

متولى؛ لأ.. الناس بتاكل.. بس زى ما تقولى الزباين خفت شوية.

آلو.. أيوة يا باشا.. بكرة.. بصارة يا باشا.. حاضر یا باشا ۱۰۰ من غیر تقلیة ۱۰۰ حاضر يا باشا.. أؤمريا باشا.

انشراح: ومين يا خويا اللي بيطلب منك بصارة في نص الليل يا متولى؟.

متولى: زبون .. زبون يا انشراح.

انشراح: وزبون إيه ده اللي يصحيك في نص الليل يا متولى؟.

متولى: ويصبحيني في الفجر كمان يا انشراح.. عشان ده أحسن منك ومن اللي خلفوكى وهلفطى بأه في الكلام عشان ليلتك دى شكلها مش معدى على خير.

انسسراح.. هي البصيارة بتتعمل إزاى یا انشراح؟۱.



مرشح يتكلم عن وعود براقة بالارتقاء بمستوى المعلم.

تتدخل انشراح وتقود هي الثورة والهتافات.

تصفيق حاد.

يسرددون وراءها الأمن لفض المشاجرة.. أحد الرجال يقترب منها.

التقيب، وأنا وعدتكوا بالنهوض بمستوى الطالب والمدرس في خيلال الفترة اللي فاتت وماحدش ينكر إن إحنا حققنا إنجازات لا تُنكر وأوعدكم الفترة القادمة بمزيد من الإنجازات.

انشراح: شبعنا بأه كلام، ووعسود.. ما بتتحققش.. النقابة بتعمل إيه للمدرسين.. مرتب المدرس ما يكفيهوش عيش حاف... وزعلانين إنهم بيدوا دروس خصوصية.. البلد لا يمكن تتقدم طول ما التعليم بالصورة دى.. وطول ما التعليم فاشل.. يبأه النظام كله فاشل.. يسقط نقيب المعلمين.. يسقط نقيب المعلمين.

الرجل: أبله انشراح.. إحنا مستنينك بالليل في مقر الحزب.

انشراح: حزب إيه؟١١.

الرجل: حزب المعارضة.. لازم نشوف حل في اللي بيحصل ده.



لقطة عامة من الخارج ومنظر عام لحزب المعارضة مكتوبًا عليه.. (حزب المعارضة) قطع



تصفيـق،

انشراح: الموضوع ده لا يمكن ينسكت عليه.. وإحنا لازم نصعد الموضوع لأعلى مستوى إنشالله نروح للريس.

الرجل: وح نوصل له إزاى ١٤٠٠

انشراح: نعتصم كلنا في مقر النقابة لحد ما ييجوا يتكملوا معانا ويعرفوا مطالبنا.

رجل: النقيب لازم يتغير.

انشراح: الحكاية مش تغيير أشخاص.

إحنا لازم ننظم مسيرة.. نعبر فيها عن مطالبنا.. إحنا مش عاوزين غير حقوقنا.. حقنا إن إحنا نعيش وناكل ونشرب.. ونعلم ولادنا صح.



متولى جالسًا على المقهى . . بصله .

التليفزيون يعرض خطاب الريس في المجلس.

بتلقائية.

متولى ينظر نحوه في غيظه. تأتى انشراح.

يدفعها ويطلع إلى البيت.

الريس: إحنا في عصر الحريات.. مصر بتعيش مرحلة غير مسبوقة من الديموقراطية.. يمكن ح تقروا في الجرايد هجومًا أو نقدًا جارحًا عليا شخصيًا.. بس أنا باشتغل وبس. بصله: ما شاء الله. الريس كلامه حلو قوى النهاردة.. ربنا يديله الصحة.. ما هي الشيلة تقيلة.. وشه مورد.. تلاقيه بياكل إيه ده يا أسطى.. تلاقيه بيفطرع الصبح 4 كيلو

متولى: جمبرى إيه .. دول هما شوية شوربة خضار.. شوربة عدس.. بصارة.. آدى أكلته. بصله: هوه إنت ح تفتى في أكل الريس كمان.

متولى: إنت كنت فين يا انشراح ده كله؟١. انشراح: كنت في الحزب. متولى: حزب إيه يا ماما؟١. انشراح: حزب المعارضة.

متولى: نعم ياختى؟١. طب إطلعى.. إطلعى قدامی ، امشی ،



متولى يلطم على وجهه.

متولى يضع يده على فمها.

صلاح خارجًا بالملابس الداخلية من حجرة النوم.. إلى الحمام وفي يده فوطة.

متولى: انضىميت لحزب المعارضة يا انشىراح!!. أحزاب البلد كلها قدامك وبينشوا.. ما لقيتيش غير حزب المعارضة يا انشراح؟!!.

انشراح: إنت خايف من إيه؟١١١. إنت جبان كده ليسه؟١.

متولى: ما هو ما ينفعش.. تبأى إنت في حزب المعارضة وأنا...

انشراح: إنت إيه؟١١.

متولى: أنا. أنا عاوز آكل عيش يا انشراح.. حلى عنى بأه أنا مش ناقصك.

انشراح: وإنت عاجبك العيشة اللي إحنا عايشينها دي ١١٥ إنت على باب الله ومش لاقي تاكل. وأنا طول الشهر بيتقطع نفسي عشان 120 جنيه. ولا عارفين نلاقي أوضة وصالة نعيش فيهم. تبأه دي حياة يا متولى ١٤٥ مين السبب في اللي إحنا فيه ده. مش الحكومة ١٤٥.

متولى: أقفلى بقك ده أحسنلك.

انشراح: الريس لازم يعرف الناس عايشة إزاى. متولى: إخرسى بأه. انت إيه؟ ١١. اسمعى يا انشراح. أنا جوزك وراجل البيت. وباقولك أهوه. يا أنا يا حزب المعارضة في البيت ده.



آدى المعارضة.. كفاية.. كفاية يا عم صلاح. انشراح في مظاهرة.. وهى تهتف وتحمل لافتة مكتوب عليها. « التغيير.. التغيير



الريس يتمشى في الحديقة ومعه حازم وكريم.

الريس، من حق كل واحد إنه يتظاهر ويختلف مع النظام.. إنما بدون تخريب.

حازم: إحنا احتوينا الموقف تماما يا سيادة

الريس: أنا لازم أشوف الولاد دول.. ولازم أسمعهم بنفسى.. أناح أروح النقابة وأتكلم معاهم.

كريم: تمام يا سيادة الريس.. ده قرار سليم

حازم: يافندم المسألة ما تستاهلش. الموضوع خلص خلاص.. وبعدين أنا شايف إن سيادتك تأجل الزيارة دى لحد ما الأمور تهدى شوية.

الريسى: تعالى يا متولى إيه رأيك في

الريس: وأأجلها ليه يا حازم ١٤.

حازم: لداوعي أمنية يافندم.

رد فعل على وجه الريس وهو في قمة الضيق.. حتى يصل إلى حجرة السفرة.

يدخل متولى ويضع الطعام.

المظاهرات اللي حصلت في البلد يا متولى؟!. متولى: دول ناس يا باشا عاوزين يخربوها.. عاوزين قطم رقبتهم.

الريس: انشراح مراتك إزيها؟.

متولى: اتطلقت يا باشا.

الريس ينظر نحوه نظرة طويلة. ترتعد فرائص متولى.





متولى يرفع الطعام.

يرن موبايل متولى الذى يضعه جانبًا. وهو ينظر للموبايل،

متولى: بالهنا والشفا يا ريس.

الريسس: مالك يا متولى .. شكلك مش مبسوطا ١٤.

متولى: شوية مشاكل في البيت يا ريس.

اثريس: رد متولي.

متوثى: آلو. نعم. قسم إيه؟!!. إيه اللي حصل یا انشراح؟۱۱.

الريس: خيريا متولى،، مراتك مالها؟١.

متولى: المدام اتقبض عليها يا ريس.. كانت ماشية في المظاهرات والحمد لله خدت جزاءها.



متولى خارجًا من القسم ومعه انشراح.

تنظر له بشك.

متولى: عاجبك البهدلة دى.. أسيب شغلى وآجى عشان أطلعك.. إنت مالك بالمظاهرات یا انشراح؟۱.

انشراح: لعلمك بأه أنا لا يمكن أسكت ومش ح أرجع عن موقفى .. وهما إزاى يطلعوني ويسيبوا بقية الزُملا في الحجز.

وإنت طلعتني إزاى يا متولى إنت تعرف مين١٩٠. إنت تصرفاتك مُريبة اليومين دول.. وكنت فين لما كلمتك؟١.

متولى: إنت طالعة م الحجز تحققى معايا أناكلا.



الريس يضحك.

ينظر حوله في خوف.

يهمس للرئيس في خوف.

الريس يضحك. في ثقة.

الريس، هو أول الجواز كده يابني .. لازم شوية خلافات ومشاكل لغاية ما تتطبعوا على بعض.. إنما بالصبر كل حاجة بتعدى.. شعبنا أكتر شعب صبور في العالم كله.

> متولى: ربنا يخليك لينا يا ريس. الريس: ح تأكلني إيه النهاردة بأه؟.

> > متولى: نفسى يا ريس...

الريس: مالك، إنت واقف قدام رئيس الجمهورية.. قول اللي في نفسك ما تخافش من أي حد.

متولى: نفسى أأكل سعادتك على مزاجى. الريس: ياللا.. أنا موافق.

متولى: بس يا ريس الموضوع ده بيننا عشان ما اتأذيش.

**الريس:** ح تأكلني إيه ١٤.

متولى: طبق كشرى بالدقة والتقلية.. حكاية. الريس: واللهي أنا نفسي رايحاله.. بس شوية صغيرين عشان القولون.

متولى: حاضر ياهندم.



ديزولف

**الربيس:** واحد كمالة يا متولى.

متولى: ربنا يديلك الصحة يا ريس.

الريس؛ تعرف يا متولى.. أحلى أكل في الدنيا آكل الشعب المصرى.. أنا عمرى ما انبسطت من أكل أي دولة في أوروبا ولا في أمريكا.. عبقرية شعبنا إنه يقدر يعمل من الحاجات البسيطة دى أشياء رائعة٠٠٠

متولى.. هموه طبق الكشرى بيتباع بكام النهاردة؟.

متولى: لسعادتك ولا لأى حد؟.

الريس: لسعادتي إزاي.. تمنه كام الطبق؟.

متولى: 3 جنيه يا ريس.. إنما لو عاوز عدس زيادة.. شوية ورد.. تقلية زيادة.. حمص..

ممكن يوصل خمساية.

الريس: كام؟١١.

متولى: هو أنا اللي مسعره يا ريس؟!١.

الريس: يعنى لو أسرة بسيطة من خمسة آفراد عاوزين يتغدوا كشرى يدفعوا 25 جنيه. ده أنا قايلينلي الطبق بنص جنيه.

متوثى: نص جنيه إزاى بس يا ريس. ده نفس الكلام اللي كانوا قايلينه للملك فأروق.. الحاجة ولعت يا ريس.

الريس: طيب اتفضل إنت يا متولى.

صارخًا.

مرعوبًا.

الريس مستاء للغاية.





لقطة من الخارج لوزارة التموين. نسمع صوت.

الصوت: أيوة يا كريم بيه.. أؤمر يافندم.

## قطع




الكاميرا تتحرك زووم على شاريوه نحو المكتب حتى تصل إلى مكتب الوزير.

وهويقف.

الوزير: سيادة الريس، حالاً يافندم. سعادتك ما تعرفش بخصوص إيه. حالاً يافندم.

> الوزير يفادر مسرعًا.. والحرس وراءه.. ويمشى في الكوريدور.





الريس جالسًا على مكتبه .. يدخل وزير التموين

يشير بقبضة يده.

غاضباً.

مرعوبًا.

دول يعملوا كام. الوزير: أنا مش فاهم سيادتك تقصد إيه؟١.

ومعلقتين عدس بجبة فوقيهم على شوية تقلية ..

كبشة مكرونة قد كده.. على شوية رز قد كده

الريس: طبق الكشرى بكام يا سيادة الوزير؟.

الوزير: بنص جنيه يا ريس.

الوزير: صباح الخير يافندم.

الريس: صباح الخير.. اتفضل..

الريس: إنت بقالك قد إيه ما أكلتش كشرى يا معالى الوزير.. ولا إنت غرقان في الكافيار والسيمون فيميه،

الوزير: يافندم كل دى إشاعات مُغرضة ومحاولات لتشويه صورة الوزارة قدام سعادتك.. طبق الكشري عند أي محل مُسعر بنص جنيه.. إحنا مراهبين الأسعار كويس.. أنا نفسى لسه واكل عند أبو طارق أول إمبارح.. الطبق بنص جنيه.

الريس: عند أبوطارق؟.

الوزير: زى ما باقول لسعادتك.

الريس: حاضر.

أطلبلي أبوطارق يابني..

مش أبومازن.. أبوطارق بتاع الكشرى.

يدوس على الجرس.

رد فعل على وجه الوزير.



حازم وكريم.

حازم: إحنا لازم نعرف مين مصدر المعلومة دى ١٤٠ الخبر ده المقصود بيه البلبلة وإثارة الرأى العام.

كريم: مش مهم مين مصدر المعلومة يا قطع حازم بيه.. المهم هية صحيحة ولا لأ؟.

حازم: هو الريس اتغدى إيه إمبارح؟١.



حازم حسين في المطبخ

متولى: كشرى يا فندم.

حازم: إنت قلت لسيادة الريس إن طبق الكشرى بخمسة جنيه؟ ١١.

متولى: سألنى يا حازم بيه لازم أقول له.

حازم: وإنت تقول له بصفتك إيه؟١. إنت عملتلنا أزمة في البلد كلها.

متولى: يا بيه ما الناس كلها عارفة.

حازم: ده آخر إنذار ليك يا متولى .. بعد كده حسابی معاك ح يكون عسير،



متولى يضع الطعام.

الريس يتأمل أرغفة الخبز.

الريس: إيه مالك مبوز كده ليه؟١

متولى: مفيش حاجة يا سيادة الريس.

الريس: مش عاوز تأكلني على مزاجك النهاردة ولا إيه؟١.

متولى: لا يا سيادة الريس اللي سعادتك تقول عليه أعمله يا فندم.

الريسى: العيش ده انتوا خابزينه هنا يا متولى؟.

متولى: آه والنعمة الشريفة يا سيادة الريس.. دقيق نمرة واحد.. قمح أمريكي ورده.. وخميرة طالياني.. و....

الريس: أنا عاوز آكل عيش من اللي كل الناس يتاكله.

متولى: بعد الشرعلى سعادتك يا ريس. الريس: نفذ اللي باقولك عليه،، بكرة تجيب لى رغيف من فرن بلدى . . رغيف مدعم .



طوابير رهيبة ومشاجرات ومتولى يكاد يفعصونه وهو يرفع يده بالفلوس.

متولى: خمس ترغفة ياعم.. أبوس إيدك عندنا شغل.. لسه رايحين آخر الدنيا.. نقيهم كويس.. انتوا مش عارفين دول رايحين لمين ١٤.

يأخذ العيش بصعوبة بعد أن خلعوا قميصه ويعود ليسحب القميص.





الربيس: إيه اللي أخرك؟١.

متولى: ساعة ونص يا ريس.. الكوبرى كان واقف خالص.

الريس، ما أنا جاى الصبح من المجلس.. والكوبرى كان فاضى؟.

متولى: ما هو إحنا اللي كنا واقفين تحت الكوبرى يا ريس.

الريس: جبت العيش؟.

متولى يخرج رغيف العيش ويضعه أمام

الريس يفتح رغيف العيش فيجد به زلط.

إيه ده؟١١. زلط؟١.

متولى: مافيش حاجة يا ريس.. ده زلط صغير سعادتك ما يعملش حاجة.

الريس، وعيدان كبريت ومسامير ١١٤.

متوثى: بس للأمانة سعادتك الرغيف بشلن..

يعنى في متناول المواطن محدود الدخل يا ريس.

يخرج عيدان كبريت.

الريس يضع الرغيف جانبًا وينظر إلى الأمام فى ضيق وهو يزفر فى أسى.



كريم مصباح يتصفح الجريدة.. ونرى مانشيت رئيسى.. إقالة وزير التموين.

يدخل سكرتيره ويضع أمامه ملف.. ويخرج.. ويدخل حازم حسين.

كريم: خبر إقالة وزير التموين لاقى ردود أفعال كويسة قوى في الشارع.. الناس مبسوطة قوى. حازم: كريم بيه.. أنا شايف إن إحنا نشوف

طباخ تانى لسيادة الريس غير متولى و..

**كريم:** ليه يا حازم بيه؟١١.

حازم: الولد ده أنا قلت من الأول لسانه طويل.. وبيتكلم كتير.

كريم: يا حازم بيه .. سيادة الريس عارف بيعمل إيه كويس.

حازم: سيادة الريس عنده مشاغل كبيرة جدًا.. علاقات خارجية وسياسات عامة سعادته بيحطها وإحنا علينا إن إحنا ننفذها .. لما ندُّخل سيادة الريس فى كل كبيرة وصغيرة نبأه بنرهقه أكتر من اللازم. كريم: أنا أختلف مع سيادتك يا حازم بيه.. لأن سيادة الريس مشغول في المقام الأول.. بمحدودي الدخل.. والناس هما أهم حاجة بتشغل سيادته. حازم: يا كريم بيه.. فيه كلام في الوزارة إن الولد ده بينقل صورة غلط لسيادة الريس عن أداء الوزارات وإن الكلام اللي قاله لسيادة الريس كان السبب الريسى في إقالة وزير التموين. كريم: الريس ما اتخذش القرار ده.. إلا لما

تأكد بنفسه والجهات الرقابية أكدت له كل

الحيثيات اللي خلته يتخذ قراره.



الريس والوزراء.. ومتولى يضع الطعام.

الريس: أنا الحقيقة حبيت إن إحنا نتغدا مع بعض النهاردة ويكون لقائى بيكم لقاء ودى.. بعيد عن الرسميات.. وعشان يبأه عيش وملح


وزير: دايما عامريا سيادة الريس.

الريس: العيش اللي نازل لحضراتكم ده.. عيش بلدى مدعم .. جاى من فرن بلدى في الحوامدية.. والفول ده من عربية من عند واحد اسمه.. إسمه إيه يا متولى؟.

متولى: إسمه كباكا يا ريس.. كباكا بتاع الفول. الريس: ما إحنا لازم ناكل من اللي شعبنا بياكله .. جايز تلاقوا في الأكل مسامير .. زلط .. عيدان كبريت.. بس زى الشعب ما بيستحملنا وبيحبنا وبيبلع لنا الزلط إحنا كمان لازم نحبه ونبلع له الزلط.. أنا عاوز الأكل ده يتمسح فورا.. اتفضلوا.

> الوزراء يبدأون في الأكل وهم في قمة الضيق.. وزير يكسر زلطة وهو يأكل.. ووزير آخر يخرج مسمارا من فمه وزير التعليم يزور متولى يخبطه على ظهره.. ويعطيه الماء من شفشق مية.

وزير التعليم، متشكر.. متشكر قوى.





انشراح تبكى.

انشراح: ما هو إنت ترسيني بأه يا متولى.. أنا متجوزة راجل والا متجوزة قفص جوافه. متولى: عيبيا انشراح.. أنا قصدى يعنى يمكن الناظر ماكانش يقصد وإنت فهمتى غلط. انشراح: ماكانش يقصد إيه؟١. بقولك حاول يبوسني متولى: حاول يبوسك .. وإنت سكتيله؟!. انشراح: بقولك ضربته.. ضربته.. إيه إنت ما بتفهمش؟١٠

متولى: خلاص يا انشراح ماول يبوسك وانت ضربتيه.. يعنى أخد جزءاه.

انشراح: ده محولني للتحقيق وعاوز يرفدني. متولى: عشان ما رضيتيش تبوسيه.

انشراح: وهوه حيقول يعني في التحقيق إنه حاول يبوسنى.. ح يتبلا عليا بأى حاجه.. اسمع.. إنت لو ماروحتلوش بكره وعرفته مقامه.. تطلقني متولى: خلاص.. إنت ما تروحيش المدرسة بكرة وأناح أعدى عليه أهزأه.. ما تفكيها بقي..

دول أهلك أول يوم يتخمدوا بدرى. انشراح: أوعى كده.. أهو أنت مفيش في

دماغك غير قلة الأدب.

متولى: ما تجيبى بوسة طيب،

انشراح: احترم نفسك يا متولى.

متولى: يا بت.. ده أنا جوزك.. هو أنا الناظر.١. انشراح: طيب اطفى النور.



عبد الفضيل جالسًا في ضيق وقد تورمت الفراش: واحد عاوز يقابل سعادتك يا حضرة عيناه.. الفراش يدخل.

يدخل الفراش ومعه بعض المدرسين.

يقوم مسرعًا ويجرى خارج المكتب وخلفه الجميع ومتولى.

قطع

الناظر.

**الناظر:** مين يا ترى.

الناظر: خليه يدخل.

نعم.. خير.. عاوز إيه؟١.

متحوله للشئون القانونية.

طلعوا الراجل ده بره.١.

نفسى ومش عاوز أتهور عليك.

الفراش: واحد اسمه متولى.

متولى: أنا سعادتك أبأه جوز أبلة انشراح مدرسة

الناظر: انت جاى تعمل إيه هنا.. مراتك

متولى: يا أستاذ عبد الفضيل بس اسمعنى.

الناظر: اتفضل من هنا يا أستاذ . . يا قرنى . .

متولى: يا أستاذ عبد الفضيل أنا ماسك

الناظر: إنت بتهددني في مكتبي وديني

لأكلم البوليس.. أناح أسجنك إنت ومراتك...

عاملين عصابة عليا.. وإنت إيه.. بلطجي.

الألماب اللي حضرتك كنت عايز تبوسها.

يدخل متولى.

الناظر: معالى الوزير في المدرسة.

امسكوا الجدع ده وبلغوا البوليس. مدرس: يا أستاذ عبد الفضيل.. وزير التعليم بيمر .. في زيارة مفاجئة للمدرسة .



وزير التعليم ينظر إلى المدرسة وخلفه الحرس والأطفال في صفوف واقفين ويغنون له أغنيه للترحيب بمعالى الوزير ، الوزير يرى متولى٠٠ يترك الجميع.. ويذهب إليه فاتحًا ذراعيه.

و. التعليم: معقولة.. متولى.. بتعمل إيه هنا؟!. متولى: حبيب قلبى .. معاليك واحشنى قوى . و. التعليم: بس يا راجل يا أونطجى .. إنت مش قايل لى إنك ح تعدى عليا في الوزارة. متولى: مشاغل يا معالى الوزير.. معاليك عارف.

الوزير: أنا مقدر طبعًا.

الناظر ينظر إلى الموقف في ذهول وقد فقد النطق.

هامسًا للناظر.

متولى: ما تكلم البوليس يا عبد الفضيل خليهم بيجوا.

ع الفضيل؛ أستاذ متولى .. اللي ما يعرفك يجهلك .. تسمح لى أبوس راسك.

متولى: حيباه أنا ومراتى يا عبد الفضيل١٠٠.



الناظر مجتمعًا بالمدرسين في المدرسة.

الناظر: وقد قررت إدارة المدرسة إعطاء السيدة انشراح مدرسة الألعاب جائزة المدرسة المثالية على مستوى المحافظة ونقلها من مدرسة ألعاب رياضية في المرحلة الإبتدائية إلى مدرسة أولى رياضيات بالمرحلة الثانوية

تصفيق المدرسين وانشراح سعيدة للغاية.



انشراح ومتولى.

انشراح: ما هو أنا عاوزة أفهم بأه.. إنت إيه حكايتك بالظبط يا متولى.. إنت طلعتنى من القسم بمنتهى السهولة ، وبعدين رجعتنى المدرسة والناظر رقانى واتلغت الشكوى في الشئون القانونية.. إنت مين يا متولى؟. فهمنی .. إنت مین ۱۶.


متولى: ح آكون مين يعنى يا انشراح.. حتة طباخ .. لا راح ولا جها.

انشراح: بأة وزير التعليم بنفسه أول ما يشوفك يجرى عليك وياخدك بالحضن.

متولى: ما هو أكل من إيدى مرة زمان واتكيف من الأكل.. وشايل لى الجميل.

انشراح: طب ده وزير التعليم وفهمناه.. طلعتني من القسم إزاى ١٤.

متولى: ما هو وزير الداخلية كان بياكل معاه.١.





الريس يضحك.

وأمامه طبق من الترمس والحمص الشام

الريس: حلوه.. وإيه تاني.. أنا عاوز أعرف كل النكت اللي بتتقال يا متولى.

متولى: كلها ما ينفعش يا ريس.

الريس: النكت يا متولى من الحاجات اللي بتميزنا.. بتخلى الإنسان يغسل همومه.

متولى: هوه فيه حاجه كده يا ريس هي مش نكته.. هو موقف كده حصل بجد أنا كنت لما شغال ع العربية كنت متعود أبعت للحي حلة كوارع كل يوم الصبح.. وبتوع الكهربا حلة ملوخية بالأرانب. فمره الواد بصله اللي شغال معايا.. غلط بعت حلة الحي لبتوع الكهربا وحلة الكهربا لبتوع الحي.. راحوا بتوع الكهربا قاطعين الكهربا والحي جه شال العربيه.

> متولى يضحك ولكن الريس لا يضحك.. متولى يبلع ريقه في خوف.

متولى: أنا الظاهر عكيت يا سيادة الريس.. بایخه مش کده.

الريس: فعلا هي بايخه قوي.١.



كريم يمسك بالجريدة ومانشيت الريس يشن حملة لتطهير المحليات في البلاد من الفساد لا للرشوة.. لا للمحسوبية.. لا للقهر.

حازم ينظر لذلك بضيق شديد.

قطع

كريم: الله عليك يا سيادة الريس.. البلد بتنضف صحيح.. أيوه كده.. الفساد بأه للركب.



متولى راكباً ميكروباص.. يقف أمام لجنة يبحث في جيبه.

لا يستطيع الرد.

متولى: نسيتها يا باشا.

الظابط: إنت شغال إيه ياله.

متولى: على باب الله يا باشا.

الظابط: قول حاحا.

متولى: أنا يا باشا.

الظابط: أمال أمى، قول ياله.. خد الواد ده

الظابط: إنزل ياد إنت وهوه هنا ، بطاقتك

ع البوكس

ياله!.

متولى: يا باشا .. أنا ما عملتش حاجه ..

واخديني على فين١٩.

الظابط: مشتبه فيك يا خويا.

يدفعونه للبوكس.



متولى: يا إخواننا.. أنا مقدرش أبات هنا.. عندى شغل الصبح.

الضابط: أحجز لك في أوتيل يا حبيبي..

روقوه في الحجز.

ينهال عليه بالقفا.



يلقون متولى داخل السجن بين المجرمين وهو في قمة الألم. المساجين يقومون وقد قرروا أن يضربوه

يهمس له.

يهمس له. يصرخ. ينهالون عليه ضرباً.

متولى: نهدا شويه يا إخواننا.. ده إحنا كلنا في الحجز مع بعض ١٠.

مجرم 1: قول أنا عيشه ياله.

مجرم 2: أوعى تقول.

متولى: ما أنا لوما قولتش ح يضربوني.

مجرم 3: ولو قلت.....

متولى: أنا مش عيشه يا ولاد الكلب.١.





متولى يثبت بلاستر على عينيه.

حازم يدخل.

كريم: وإزاى ما تكلمنيش.. إزاى ما تتصلش

متولى: أنا لحقت أتكلم يا باشا.

حازم: إيه اللي حصل له الواد ده.١.

**كريم:** اتمسك تحرى إمبارح.

حازم: ما هو شكله وش سجون ومسكوك ليه ياله.

متولى: ما كانش معايا بطاقة يا باشا.

حازم: تستاهل.. اسمع.. أوعى تجيب سيرة لسيادة الريس عن اللي حصل أحسن لك.. مش عايزين نضايقه على الصبح.. أنا بقولك أهوه.١.



متولى واقفا أمام الريس. لا يعرف ماذا يقول.

في سخرية.

الريس ينظر نحوه في غيظ.

متولى ينفجر في البكاء.. ثم.. وهو يهذى من فرط انفعاله.

الريس ينظر نحوه بتعاطف شديد.. ثم يربت على كتفه بحنان دافق.

الريس يأخذ متولى ويمشى به بجوار السور. متولى مع الريس في الحديقة يكلمه.

الريس: ما هي دي لا يمكن تكون وقعة.. مين اللى ضربك يا متولى.

متولى: يا ريس أنا.. أنا.

الريس: مش عايز كدب.

متولى: خدونى تحرى يا ريس. اشتبهوا فيا. الريس؛ أنا عاوزك تحكيلي اللي حصل بالظبط. متولى: أول ما مسكوني ركبوني عربية البوكس مكيفه يا ريس.. ودخلنا القسم قدمولنا مشروب الضيافة عصير فراولة يا ريس.. وبعدين فيه فوط سخنة كده فيها كولونيا بأوا يدوهالنا واحد واحد.

الريس: وسمعوك مزيكا في القسم يا متولى.

متولى: مزيكا.. آه.. بس شعبيه شوية.

الريس: انت كداب وتستاهل اللي جرالك.

متولى: ما هم قالولى ما اتكلمش يا ريس.. هما اللي قالولي ما اتكلمش.

الريس: تعالى يا متولى.

الريس: تعرف يا متولى .. ورا السور ده شعب كبير قوى.. حضارة وتاريخ.. 75 مليون نسمة وأنا اللي مسئول عنهم كلهم. مسئول عن أكلهم وشربهم وثقافتهم وسعادتهم.

متولى: ربنا يكون في عون سيادتك يا ريس. الريس: متولى .. أنا عاوز كل واحد من الشعب يحط نفسه مكانى .. تخيل انت نفسك يا متولى إنك بأيت رئيس جمهورية لمدة عشر ثواني بس . ، ح تعمل إيه؟١.

متولى: أنا يا ريس.

الريس: أيوه.. انت رئيس جمهورية يا متولى.

المدة خلصت يا متولى.١.

انت لسه واقف الـ

متولى ينظر نحوه وقد فقد النطق.

متولى يهم بالكلام.

متولى يجرى مهرولا إلى المطبخ.





مقهى الحارة.. الريس ومتولى داخلان.. والريس متنكر في هيئة الرجل الصعيدي.. صلاح جالسًا.. وعبده الضرس وباقى رواد المقهى والتليفزيون يذيع خطابًا للرئيس.

متولى: معلش قهوة تعبانة شوية مش قد المقام.. اتفضل يا ريس.

الريس: بلاش كلمة يا ريس دى هنا خالص. متولى: حاضريا باشا..

سلامو عليكوا يا رجالة.. تشرب إيه يا باشا؟. الريس: أنا حاخد قهوة.

متولى: واحد قهوة هنا للباشا.، على مية معدنية.

الريس: لا.. مية من الحنفية.

صلاح ينظر نحو التليفزيون وهو يسمع الريس يتكلم عن اهتمامه بمحدودي الدخل.

صلاح: ما كفاية بأه.. شبعنا كلام.. هما مفيش غير الكلمتين دول.

متولى: الله يخرب بيتك يا عم صلاح.. ما تقفل بقك ده.

صلاح: الخمس عيال اللي عندي أأكلهم منين.. وعمال يقول محدودي الدخل.

الريسى: وانت تخلف خمس عيال ليه .. ما تخفوا رجليكوا شوية عشان تعرفوا تربوهم. صلاح: إيه يا عم متولى.. مين الكابتن ده اللي معاك؟

الريس: سيبك من متولى.. خليك معايا.. إنت عاوز تخلف وتنبسط والحكومة هي اللي تأكلك وتشربك وتعلم ولادك.. لازم تشيل المسئولية شوية.. ولا إيه؟.

صلاح: الأخ ده مين يا متولى.. مخبر؟.

متولى: مخبر مين يا تور.. ده اللي كل المخبرين بيروحوله في الآخر.

صلاح: يانهار إسود ومنيل. يبأه صول في الداخلية وانا عكيت أنا قايم.

إنت مش رايح الفرح؟.

متولى: لأ.

صلاح: ده فرح بصله الصبى بتاعك.. معقولة تسیبه ف یوم زی ده ۱۶۰.

الريس: قوم يا متولى.

متولى: على فين يا ريس؟.

على فين يا عمنا؟.

الربيس: على فرح بصله.

متولى: سعادتك ح تروح فرح بصله؟.

الريس: أيوه.

متولى: يا باشا قول كلام غير ده.

الريس: ياللا.

متولى: مكتوبالك يا بصلة يا بن العبيطة.

يهمس لمتولى.

الريس يضربه على رجله.



فرح شعبى بسيط للغاية .. وبصلة جالسًا في متولى: بصلة .. العريس الصبى بتاعى .. الكوشة.. وبجواره عروسة.

متولى ينقط في الفرح.

الريس يزغرله.

الريس يخرج مبلغا ويعطيه نقطة لمتولى.

متولى هامسا لبصلة في الكوشة

بصلة ينظر نحوه.

يسقط مغشيًا عليه.. والعروس تصوت.. وحالة هرج ومرج.. نَفاجأ بظهور حازم متخفيًا وهو لا يصدق عينيه مندهشا.

قطع

وتلميذى.. ابن السيدة عيشة.. الصياعة أدب.. وانا من هنا باحيى الباشا الكبير.. عمنا.. اللي شرفنا ونورنا.. اللي عملنا قيمة.. في الداخل وفى الخارج.. وأحلى سلام للحكومة واحد واحد.. ولكبير العيلة.. ورقصني.

متولى: عارف مين اللي نقطك في فرحك ده یا روح امك؟

بصلة : عارفه .. شفته في سوق العبور .

متولى: سوق العبوريا أهبل.. ده هو العبور

نفسه.. ده الريس.

بصلة ، ريس مين ١٤.

متولى: رئيس الجمهورية.

بصلة: هوه.. والنعمة هوه.



الريس جالسا يتأمل صفحة النيل البديعة.. ومتولى يمص قصب.. ويلقى بالمصاص في النيل.

يضربه على يده.

ضاحكا.

الريس: ياااه.. يا سلام يا متولى.. دى أحلى ليلة قضيتها من 25 سنة.. أول مرة أقعد في وسط الناس.. انا.. أنا محروم من الناس يا

متولى: مش ح تروّح يا ريس؟.

الريس: لا.. أنا عاوز أقعد ع النيل شوية.. النيل ده أنا بحبه جدا.. ياما غسلت فيه همومي.. من وأنا طفل صغير كنت أول ما الدنيا تضيق بيا.. أجرى على النيل.. وكنت أحس إنه هوه كمان بيجرى عليا.. إنت بتعمل إيه.١١. حد يرمى الزبالة في النيل يابني؟١٠.

متوثی: هی جات علی عود قصب یا ریس.. دول ما سابوش حاجة ما راموهاش في النيل. الريسس: النيل ده يا متولى بالنسبة لي حاجة كبيرة قوى .. أحلامى كلها كانت هنا .. وطموحاتى كلها .. وطفولتى وشبابى .. كنا .. دايما نقعد وناكل بطاطا في المكان ده.

متولى: نفسك رايحة للبطاطا يا ريس؟١٠.

**الريس:** آه.. تصور.


متولى: أبص لك على حد يا ريس.. هما قطع بيعدوا من هنا.





حازم في سيارة.

حازم: ظابط البطاطا ينزل بسرعة. صوت: حاضريا فندم.





يمر بائع بطاطا.. وأمامه عربة بطاطا ستانلس ستيل.. ويقدم للرئيس بطاطا ملفوفة في ورق مفضض .. أنيق للغاية ومقشرة. يأكل بتلذذ.

الريس: إيه ده.. إيه النضافة دى.. ومتقشرة كمان لتعرف يا متولى.. أحمد بيه شوقى كان بيكتب كل أشعاره وهو هنا على النيل.. العشاق الفقرا.. كانت دى هي فسحتهم الوحيدة.. هما راحوا فين العشاق يا متولى.



حازم في السيارة.

حازم: اتنين عشاق فورًا يقعدوا على الكورنيش.



مسعدة وعبد السبلام الدهشيان بملابس أخرى .. يجلسان وهما ينظران كل منهما نحو الأخر بهيام وحب جارف.

الريس ينظر حوله وقد فهم كل شيء.

عبد السلام ينتفض رعبًا.

التليفزيون قبل كده يا ريس. الريس، إيه يا عبد السلام يا دهشان. إنت سایب المسرح وجای تحب هنا؟

متولى: اللي قاعدين دول.. أنا شايفهم في

ع. السلام: ربنا يخليك يا ريس.

الريس؛ اسمع يا عبد السلام.. لوشفت وشك في حتة تاني غير المسرح.. ح أدبحك.

ع. السلام: حاضريا ريس.

يجرى مسرعًا من أمام الريس ومعه مسعدة.



التاكسي كان واقفًا .. متولى يفتح الباب للرئيس. متولى: اتفضل يا ريس.

الريس: قلتلك الكلمة دى ما أسمعهاش منك

هنا خالص.. إنت فاهم؟

نكتشف أنه نفس السائق الذي هرب من الريس حينما خرج أول مرة.

بغلاسة.

السائق: على فين يا إخواننا؟

الريس: اطلع على مصر الجديدة.

السائق: حاخد أربعين جنيه قبل ما نطلع.

متولى: ما بلاش مع ده.

يركبان وينطلق التاكسي.



السائق: شوف البنزين بأه بكام .. ح نعمل إيه يعنى.. ح نجيب منين يا عم الحاج ربنا ينتقم منهم.

متولى: يا عم اكتم بأه.. وفوت ليلتك على خير. السائق: أنا ما أخافش غير م اللي خلقني.. أنا قلت الكلام ده للريس نفسه .. في وشه. الريس، قلتهوله إزاى١٤

السائق: ماهو ركب معايا مرة قبل كده.. وأول ما شفته اتفتحت فيه .. قلت له على كل اللي في

معاكو بطايق يا اخواننا .. عشان داخلين على لجنة بس..

الريسس: أنا معاييش بطاقة.. تضمني یا متولی؟

متولى: برقبتى يا ريس.

السائق يرى لجنة من بعيد.

الريس يبتسم.

الريس يلكز متولى بيده.

السائق ينظر في المرآة.. يرى الريس.

حينما يسمع كلمة يا ريس.

يفتح الباب ويخرج مهرولا مثل المرة الأولى.



متولى يقوم بعمله في المطبخ .. يدخل كريم وحازم.

كريم: مبروك يا متولى.

متولى: خيريا باشا!

كريم: مراتك ولدت.

متولى: ياما انت كريم يارب.. ربنا يبشرك يا باشا.

حازم: جابت ولد.. وسميناه محمد،

متولى: أحلى اسم سعادتك.

كريم: ياللا .. روح بأه يا أبو محمد عشان تشوف مراتك وابنك،

متولى: والمستشفى واله.

حازم: روح بأه.

متولى: ربنا يخليك لينا يا باشا .. ربنا يخللي

الريس١

يخرج جاريًا.



متولى في المستشفى .. يأخذه رجال ويوصلونه بكل حب.

يرى أم انشراح وصلاح والأولاد.

متولى يدخل إلى الحجرة.

رجل 1: الأستاذ متولى.. اتفضل.. مبروك. متولى: الله يخليكم.. هيه فين؟! صلاح: مبروك يا أبو محمد.. إيه المستشفيات الشياكة دى .. ده انت طلعت سوسة .. محوش ده كله علشان تولد مراتك في مستشفى فخم كده. أم انشراح: متولى طول عمره بحبوح وما يهموش!



متولى يقبل انشراح.

يحمل الولد وهو في قمة السعادة ويدلله.

ينظر فيفاجاً بسلسلة مكتوب عليها محمد أو مصحف

> يكبر في أذنه. يأخذ الولد بعيدا

متولى يختلى بابنه الرضيع .. ثم يهمس في أذنه.

الولد ينهال على وجه أبيه ويبكى،

متولى: مبروك يا انشا.

انشراح: ربنا ما يحرمني منك يا متولى.. وليه كل التكاليف اللي كلفتهالك دي؟١ متولى: وريني الواد .. عاوز اشوف ابني .

انشراح: والسلسلة الدهب جبت فلوسها منين يا متولى.

متولى: السلسلة؟١

آه.. السلسلة.. ده ابنى يا انشراح.. لا يمكن أن أستخسر فيه حاجة .. يا حمادة يا جميل .. هات بوسة ياله.

الله أكبر.. الله أكبر.

انشراح: إيه.. واخد الواد ورايح فين؟! متولى: ابنى وبينا أسسرار.. عاوز أقول له حاجة في ودنه.. انت إيش حشرك بينا. انشراح: والله انت اتجننت يا متولى.

متولى: اسمع يابني.. أناح أقولك حاجة مفيش مخلوق يعرفها في الدنيا دى غيرك انت .. عارف أبوك شغال إيه يا محمد .. طباخ الريس.



متولى جالساً وحازم يعنفه. لنفسه.

حازم: إنت مش تمسك لسانك ده يا متولى.١. متولى: عملتها يا محمد.. تبلغ في أبوك وإنت لسه في اللفة.

حازم: إنا أنذرتك قبل كده.. المرة الجاية أنا ح أتصرف ولاحظ إنك بأيت أب.. يعنى راعى أكل عيشك . . أنت اتكلمت مع سيادة الريس على الخضار المرشوش بمبيدات مسرطنة؟١.

متولى: يا بيه.. أنا الكلام جاب بعضه.. عليا النعمة ما أقصد أقول أى حاجة.



متولى يضع الطعام أمام الريس.

متولى يضحك في خجل.

الريس: إنت لسة قاعد عند حماتك يا متولى؟ متولى: أيوه يا باشا.

الريس: ولسه خال مراتك والعيال في الشقة برضه.

متوثى: ح يروحوا فين يا ريس. الريس: أمال إنت جبت محمد ابنك ده ازاى؟١ متولى: لا ده كان يوم كده كان ربنا كرمنا فيه وخال حماتي مات في البلد.. أخدت أخوها والعيال وراحوا على البلد عشان يعزوا.

الريس: وسابولكوا البيت.

متولى: أيوم يا ريس.

الريس: وبهدلتوا الدنيا إنت وانشراح ليلتها. طيب مش عاوزين تخاووا محمد بأه؟١

متولى: ربنا يسهل يا ريس.. حماتى ليها عم بيخلص.، ع التشاطيب يعنى.

الريس، ومقدمتش ليه في إسكان الشباب.

متولى: مقدم يا ريس.. من تسع سنين.

الريس: تسع سنين وما استلمتش الشقة.

متولى: والله لوسمادتك تعرف حدفى الإسكان يبأه جميل سعادتك في رقبتي طول عمري.




انشراح تنفلت من يديه.

نری سریر ودولاب ومتولی یجذب انشراح فی حب. متولی: أخیرًا بقالنا سریر وأوضة نوم یا انشراح. انشراح؛ عيب يا متولى، إنت مجنون، إيه اللي بتعمله ده؟!

متولى: محروم.. محروم يا انشراح.

الكاميرا تتسع لنجد كل هذا فوق سيارة نصف نقل.. في الشارع متجهة إلى الشقة الجديدة.

انشراح: ولاح تلمسنى. متولى: ليه بس يا انشراح. انشراح: أما تقوللي.. إنت مين بالضبط.





متولى وانشراح يفتحان الشقة.. وفي يدها الطفل الرضيع.. متولى يحاول أن يقبل انشراح فتمتنع. متولى: ما ينفعش كده يا انشراح.. عليا

النعمة دى أول مرة أحس أنى عريس جديد.. طیب جیبی بوسة.

انشراح: أما تقوللي انت شغال إيه بالضبط.. أوعى كدها

> متولى: ما تضغطيش عليا يا انشراح. انشراح: خلاص انت حُر.

> > تدخل وتبدأ في خلع ملابسها.. متولى يجرى مسرعًا.. تغلق الباب.. يطرق الباب. انشراح تفتح الباب مذعورة.

متولى: انشراح.. أنا طباخ الريس يا انشراح. انشراح: طباخ مين ياخوياا متولى: طباخ الريس يا انشراح. انشراح: آه.. كده أنا فهمت يا متولى. متولى: انت ما تعرفيش الريس يا انشراح.. الريس طيب قوى .. ده حتى أكلته ضعيفة .. الريس بيحبنا.. ونفسه يقرب مننا.. بس فيه ناس حواليه مش عاوزينه يقرب يا انشراح.



متولى نائمًا بجوار انشراح والطفل يبكى. انشراح تهدهد الطفل.

> صوت جرس الباب. يقوم من السرير.

انشراح: خير.. الله أكبر. متولى: ما تنام بأه يا أستاذ محمد. انشراح: لازم حلم حلم وحش يا متولى. متولى: هوده يعرف يحلم.

إيه ده.. مين اللي ح يجيلنا الفجر كده!



يفتح الباب.، ليجد حازم حسين وفي يده علبة شيكولاته.

حازم: إزيك يا متولى.. معلش زيارة مفاجئة كده في وقت متأخر شوية.

متولى: يا بيه ده أنا ليا الشرف.. معلش البيت مش قد المقام.. وليه التعب ده كله يا باشا.

حازم: وازى البيبي؟

متولى: مابينيمناش يا باشا.. احنا صاحيين واللهى.

حازم: طبعًا يا متولى.. أنا مقدر ظروفك.. انت بأيت أب وعليك مصاريف.. وأنا عارف المرتب اللي بتاخده ما يكفيش.

متولى: أهى مقضية يا باشا.

حازم: إنت لسه شاب ودى الفترة اللى لازم تأمن فيها مستقبل أسرتك ومستقبل الولد.

متولى: ربنا يخليك يا باشا.

حازم: أنا عارف إن موقفك حرج.. وإنت مش ح تقدر تقول الكلام ده إنما أنا أقدر أفاتح سيادة الريس فى رغبتك دى.. إحنا ح نقدر نجيبلك شغلانة فى أى أوتيل كبير.. بمرتب كويس.. تكون نفسك.

متولى: سعادتك تقصد إيه يا باشا.

حازم: قصدى إنى أعفيك من الحرج، وأنا اللي ح أخلص لك الموضوع ده،

متوثى؛ يا باشا أنا مش عاوز أشتغل في أوتيلات. حازم: يعنى إيه؟١ متولى: يعنى أنا مش ح أسيب الريس لغاية آخر يوم في عمري.

> حازم يقف في حزم وغضب ويمضى ويغلق الباب من ورائه.

## قطع



متولى ماشياً في الشوارع.. وهو ينظر نحو صورة الريس.



متولى يطرق الباب.

عم سليمان يفتح الباب.

سليمان: متولى .. فيه إيه ١٤. إيه اللي جابك ع الصبح كده.. تعالى خش يا متولى.١.



نرى صورة الريس فى بيت عم سليمان وبجوارها صورة زفاف أولاده.

يبنسم في سخرية.

سليمان: خير.

متولى: إنت عايش لوحدك.

سليمان: أيوه.. العيال اتجوزوا وكل واحد في بيته وأنا خلاص بأيت معاش.

متولى: الظاهر إنى ح أطلع معاش بدرى أنا كمان يا عم سليمان.

سليمان: ليه .. إيه اللي حصل ١٤.

متولى: عاوزيني أسيب الشغل عند سيادة الريس. سليمان: آه.. تبأه فتحت بقك واتكلمت يا متولى. متولى: أنا ما قولتش لسيادة الريس حاجة غلط.. أنا قولت له اللي أنا شايفه بعينيا.


سليمان: ما هوده اللي طلعني معاش يابني وانت فاكر إن السن هو اللي طلعني معاش .. اللي طلعني أنى قولت لسيادة الريس وكلامي ماعجبهمش.. بس أنا قعدت سنين على بال ما اتكلمت.، إنما إنت داخل شاطح كده.. زى القطر.

متولى: والعمل يا عم سليمان.

سليمان: تسكت.

متولى: ما أقدرش يا عم سليمان.. ماقدرش الريس يسألني وأكدب عليه ولا.

سليمان: يبأه ح تقعد قعدتي دي.١.





حازم حسين أمام الريس.

حازم: ده التقرير الطبي بتاعه يا فندم.. عنده فيروس (سي) ولازم يتعالج.

الريس: لازم تعالجوه كويس وفي أحسن

حازم: طبعًا يا فندم اللازم كله ح يتعمل. الريس: وطمنوني عليه أول بأول.

حازم: حاضريا فندم.١.

الريس: فيه حاجة يا حازم.

حازم: فيه طباخ جديد هايل اختبرناه يافندم وبنستأذن سعادتك إنك تشوفه.

الريس: طيب، طيب.

حازم: تعالى يا حسنين.

يدخل الطباخ الجديد بالطعام ويضعه آمام

الريس ينظر نحوه.. ونحو الطعام.

حسنين يجيب بطريقة محفوظة مدرب عليها وحازم يومىء برأسه سعيدا بإجابات حسين.

الريس: إنت متجوزيا حسنين.

حسنين: أيوه يا سيادة الريس متجوز.

الريس ، عندك كام عيل.

حسنين: عندى خمس عيال.

الريس: قوللى يا حسنين. هو طبق الكشرى

حسنین: بنص جنیه یا ریس.

الريس: والرغيف المُدعم.. حجمه قد إيه

يشير إلى أنه كبير. الريس ينحى الأطباق جانبًا.


حسنين: قد كدهوه. الريس: أنا ما باكلش من الكلام ده.



متولى أمام العربة.. والبلدية تلم الكراسى والحلل.. ومتولى يصرخ.

متولى في قمة الفيظ.. يجد أمامه انشراح.

تجلس بجواره على الرصيف.. متولى ينظر لنجد صورة كبيرة للرئيس وهو يحيى الجماهير.







سيارة سوداء بزجاج فاميه تقف أمام المنزل ووراءها سيارتان. ينزل منهما بودى جاردز (الحرس) ثم نرى الباب يفتح.. وقدم تنزل من السيارة الأمامية على الأرض.

## قطع



على السرير متولى وانشراح وبينهما الطفل محمد يقومان على صوت طرق على الباب.. يذهبان إلى الصالة الخارجية.

## قطع



متولى يفتح الباب.. وخلفه تقف انشراح ليفاجأ

بأن الذي على الباب هو السيد الريس.

الريس: إيه يا متولى.. إنت نايم والا إيه ١٤. متولى: النايم يصحالك يا ريس.. فخامتك بنفسك.. أنا مش مصدق نفسى.. سيادة الريس يا انشراح.

الريس: إيه أناح أفضل واقف على الباب

انشراح: اتفضل یا ریس.

الريس: إزيك يا انشراح.

انشراح: الله يسلمك يا ريس.

الريس: ما هي شقة حلوه أهيه.. أمال بيقولوا

ضيقة يعني.١.

متوثى: من خيرك يا ريس.

يدخل.

يجلسون.

ينظر حوله.

الريس يتناول قله موجوده بجواره ويشرب منها.

الريس: إنتوا لسه ما جبتوش تلاجه.

متولى: قسطها حراق يا ريس.

الريس: وإنت صحتك عامله إيه دلوقت يا متولى.

متوثى: زى البمب يا ريس.

انشراح: المشكلة مش في الصحه.

الريس: أمال في إيه يا انشراح.

انشراح: المشكلة في الصحة والتعليم والبطالة والفساد.

يقاطعها ويلكزها بيده.

قى عصبيه،

يصمتان.

صمت.

متولى: إهمدى يا انشراح.

الريس، سيبها.. سيبها يا متولى.. أدينا بنحاول يا انشراح نعمل كل اللي في وسعنا.

أعمل إيه بس.، أعمل إيه ١٤، ضغوط علينا من بره ومن جوه.. ومفيش حد حاسس باللي احتا فيه.. ولا حد عاجبه حاجة.. أسيب الحكم وأمشى يعنى.

الله.. إنتوا عاوزيني أمشى١٤. مابتردش ليه.

متولى: لا يا ريس قطع لسان اللي يقول كده.. ح تمشى وتسيبنا لمين يا ريس.

الريس: انتوا فاكرين الشيله سهلة.. ده مم.. مش هم واحد.. إنتوا بأيتوا 75 مليون.

انشراح، 75 مليون ومش قادرين نتكلم يا ريس.١. الريس، ما تتكلموا إنتوا خايفين من إيه ١٤.

متولى: أنا مش خايف غير على إبنى يا ريس. الريس: خايف عليه من إيه ١٤.

متولى: خايف ياخد رضعه لبن يطلع ملوث.. خايف يجيله التهاب رئوى من الهواء الملوث اللي حوالينا ومعرفش أعالجه.. خايف ييجي يخش المدرسه ما يلاقيش دكة يقعد عليها.. خايف يتخرج من الجامعة ويقعد في أرابيزي 20 سنة مش لاقى شغل.. خايف يحب واحدة وما أقدرش أجوزهاله.

الريس، وانت يا انشراح.. خايفة من إيه انت کمان؟.

انشراح: خايفة يا ريس يطلع ما يلاقيش له أى حقوق.. خايفة ما يبألوش صوت ولا حد يسمعه.. خايفة يكره البلد اللي كُلنا حبيناها. الريس، وح تفضلوا خايفين كده على طول. ا **لإثنان:** ح نعمل إيه يا ريس.

الريس، إتكلموا.. إنزلوا من بيوتكوا.. وروحوا انتخبوا اللي أنتوا عاوزينه.. ماحدش بيبع صوته بقزازة زيت ولا 50 جنيه.. إنت مش إنتخبتني

متولى: طبعا يا ريس.

الريس: وانت يا انشراح.

انشراح: لا يا ريس.١.

الريس: وآهو أدينا قاعدين مع بعض إحنا التلاته؟.

الربيس: ده محمد.١.

بسم الله ما شاء الله.

إيه ده.. ده شعره شايب خالص.

متولى: من الذل اللي ح يشوفه يا ريس.١.

صوت بكاء محمد من الداخل. الريس مبتسما.

انشراح تخرج بالطفل الرضيع.

الريس يحمله. فنجد شعره كله أبيض وقد شاب مبكرا.

الريس يضحك وصوت بكاء عال جدًا.

قطع



متولى يقوم مفزوعًا من النوم.. انشراح تقوم على صراخه،

متولى يقوم بالفائلة الداخلية وبنطلون البيجاما ويلبس الشبشب الزنوبة ويخرج من الحجرة.



متولى يفتح الباب خارجًا.

للريس.. لازم أعرفه اللي بيحصل في البلد. انشراح: ح تروح له كده يا مجنون. متولى: أوعى يا انشراح.. أوعى. انشراح: يا متولى.. يا متولى.

متولى يغلق الباب وهي تنادي عليه.

انشراح: انت رایح فین یا راجل.. ما ترد علیا.

متولى: سيبينى يا انشراح.. أنا لازم أروح



متولى واقفًا أمام صورة ضخمة للرئيس وهو يصرخ وقد التف حوله بعض الناس.. يتزايد عددهم تدريجياً.

عربة شرطة وعربة إسعاف تدخل الكادر وقد تكاثر عدد الناس حول متولى.

متوثى: عاوز أكلمك يا ريس.. عاوزك تسمعنى یا ریس. الکشری بخمسة جنیه یا ریس. واللحمة بستين جنيه يا ريس. والأنابيب بتفرقع فى وشنا يا ريس، والدم ملوث يا ريس.

قطع



مانشيت على إحدى الجرائد.

القبض على مختل عقليًا يحاول إثارة الشغب والبلبلة في الشارع المصرى ويدعى أنه كان طباخ الريس.

وصورة لمتولى بقميص المجانين.



تترات النهاية

بيوسف معاطى

كتب للمسرح والسينما والتليفزيون والإذاعة وكتب للصحافة مقالات ساخرة وأبوابًا من أشهر الأبواب في الصحافة العربية.. واليوم ونحن نقدم له أعماله السينمائية في سلسلة جديدة والتي كان نجم نجوم العالم العربي الفنان القدير عادل إمام قاسمًا مشتركًا معه في معظم أعماله التي أثارت الكثير من الآراء في الصحافة العالمية ـ بدأ بفيلم طباخ الريس ثم نتبعه بأفلامه مع الفنان الكبير عادل إمام.

النباشير

## الأعمال السينمائية

\* ياتحب ياتقب . \* ح نحب ونقب. \* الواد محروس بتاع الوزير . \* التجربة الدانمركية . \* عريس من جهة أمنية . \* السفارة في العمارة . \* مرجان أحمد مرجان . \* طباخ الريس . \* حسن ومرقص .

كثيرًا ماتمنيت أن أعرض السيناريو الذي أكتبه على المشاهد العادي لأعرف رأيه قبل أن يصور الفيلم ويعرض في السينما .. وظلت هذه الفكرة المجنونة تلح على رأسي .. فأصعب مراحل العمل الفني .. هو انتظار عرض الفيلم ليعرف الكاتب رأى الناس .. بعد أن افنع المخرج والمنتج والمثلين .. الأهم أن يقتنع الناس .. ولكن هذا لك يحدث أبدًا وظللت أعاني تلك الماناة الوَّلة قبل نزول الفيلم في كل مرة .. والسيناريو الذي بين يديك ياعزيزي القاريء .. هو النسخة الكاملة لفيلم طباخ الريس كما كتبته على صورته الأولى .. والذي شجعنا أنا وصديقي الناشر المثقف المحترم محمد رشاد على أن نطبع هذا السيناريو، ونبدأ هذه الخطوة <u>بالاقبال</u> الجماهيري الكبير، الذي لاقاه الفيلم والضجة التي آثارها حين عرض 2 العرض.. ونحن نحلم.. يومًا ما .. أن نقدم للقارىء سيناريوهات لم ت 72475 تعرض في دور السينما.. نقدمها للقارىء أولا.. فإذا أحسسنا بأنها حازه ربما نحولها إلى شرائط سينمائية بعد ذلك .. إنها تحربة ديموقراطية في يكون للقارئ العادى الحكم والرأى النهائي فيها..

يوسف م





37 19t